

大般涅槃经

(三十六卷：第七卷至第九卷)

北凉天竺三藏昙无讖译 梵

宋沙门慧严慧观同谢灵运再治



南無本師釋迦牟尼佛

说明

本简体校正版《大般涅槃经》(南本)电子书,是根据《乾隆大藏经》大乘涅槃部,第0110部,北凉天竺三藏昙无讖译梵、宋沙门慧严慧观同谢灵运再治《大般涅槃经》(36卷)影印本校正的。标点符号仅供参考。

为了便于读诵,本电子书按顺序每三卷合为一册,共十二册。若每天读一册,可十二天读完。

本电子书是免费结缘品。特此说明。

仁慧草堂

二〇一八年九月

目 录

起诵仪	- 1 -
香赞	- 1 -
开经偈	- 1 -
大般涅槃经卷第七	- 2 -
邪正品第九	- 2 -
四谛品第十	- 17 -
四倒品第十一	- 20 -
大般涅槃经卷第八	- 22 -
如来性起品第十二	- 22 -
文字品第十三	- 45 -
鸟喻品第十四	- 52 -
大般涅槃经卷第九	- 60 -
月喻品第十五	- 60 -
菩萨品第十六	- 66 -
结诵仪	- 95 -
补阙真言	- 95 -
发愿文	- 95 -
回向偈	- 96 -
回向偈	- 96 -
三皈依	- 97 -

● 起诵仪

香赞

(一遍)

炉香乍爇. 法界蒙薰. 诸佛海会悉遥闻. 随处结祥云. 诚意方殷. 诸佛现全身.

南無香云盖菩萨摩诃萨 (合掌三称)

南無本师释迦牟尼佛 (合掌三称)

开经偈

(一遍)

无上甚深微妙法 百千万劫难遭遇
我今见闻得受持 愿解如来真实义

大般涅槃经卷第七

北凉天竺三藏昙无讖译 梵

宋沙门慧严慧观同谢灵运再治

邪正品第九

尔时，迦叶白佛言：“世尊！如上所说四种人等，应当依止耶¹？”

佛言：“如是，如是。善男子，如我所说，应当依止。何以故？有四魔故。何等为四？如魔所说诸余经律能受持者。”

迦叶菩萨白佛言：“世尊！如佛所说有四种魔。若魔所说及佛所说，我当云何而得分别？有诸众生随逐魔行，复有随顺佛所教者，如是等辈，复云何知？”

佛告迦叶：“我般涅槃七百岁后，是魔波旬渐当坏乱我之正法。譬如猎师，身服法衣。魔王波旬亦复如是，作比丘像、比丘尼像、优婆塞像、优婆夷像，亦复化作须陀洹身，乃至化作阿罗汉身及佛色身。魔王以此有漏之形作无漏身，坏我正法。是魔波旬坏正法时，当作是言：‘菩萨昔

¹ 大正藏：应当依止耶；永乐北藏及龙藏：应当依耶

于兜术²天上没，来在此迦毗罗城白净王宫，依因父母爱欲和合生育是身。’若言有人生于人中³，为诸世间天、人大众所恭敬者，无有是处。又复说言：‘往昔苦行，种种布施头目、髓脑、国城、妻子，是故今者，得成佛道。以是因缘，为诸人、天、乾闥婆、阿修罗、迦楼罗、紧那罗、摩睺罗伽之所恭敬。’若有经律，作是说者，当知悉是魔之所说。

“善男子，若有经律，作如是言：‘如来正觉久已成佛，今方示现成佛道者，为欲度脱诸众生故，示有父母，依因爱欲，和合而生，随顺世间，作是示现。’如是经律，当知真是如来所说。若有随顺魔所说者，是魔眷属；若能随顺佛所说者，即是菩萨。

“若有说言‘如来生时，于十方面各行七步不可信’者，是魔所说。若复有说‘如来出世于十方面各行七步，此是如来方便示现’，是名如来所说经律。若有随顺魔所说者，是魔眷属；若能随顺佛所说者，即是菩萨。

“若有说言：‘菩萨生已，父王使人，将诣

² 大正藏：率

³ 大正藏：若言有人生于人中；永乐北藏及龙藏：若有人生于人中

天祠，诸天见已，悉下礼敬，是故名佛。’复有难言：‘天者先出，佛在其后。云何诸天礼敬于佛？’作是难者，当知即是波旬所说。

“若有经言：‘佛到天祠，是诸天等，摩醯首罗、大梵天王、释提桓因，皆悉合掌敬礼其足。’如是经律，是佛所说。若有随顺魔所说者，是魔眷属；若能随顺佛所说者，即是菩萨。

“若有经律说言：‘菩萨为太子时，以欲心故，四方聘⁴妻，处在深宫，五欲自娱，欢悦受乐。’如是经律，波旬所说。若有说言：‘菩萨久已舍离欲心、妻息之属，乃至不受三十三天上妙五欲，如弃涕唾，何况人欲？剃除须发，出家修道。’如是经律是佛所说。若有随顺魔经律者，是魔眷属；若有随顺佛经律者，即是菩萨。

“若有说言：‘佛在舍卫祇洹⁵精舍，听诸比丘受畜奴婢、仆使、牛、羊、象、马、驴、骡、鸡、猪、猫、狗、金、银、琉璃、真珠、玻瓈、砗磲⁶、码瑙、珊瑚、琥珀、珂贝、璧玉、铜、铁、釜鍍、大小铜盘所须之物，耕田种植，贩卖市易，储积谷米。如是众事，佛大慈故，怜悯众

⁴ 大正藏：娉

⁵ 大正藏：陀

⁶ 大正藏：车渠

生，皆听畜之。’如是经律悉是魔说。若有说言：‘佛在舍卫祇陀精舍那梨楼鬼所住之处，尔时，如来因婆罗门字羗羗德及波斯匿王说言：“比丘不应受畜金、银、琉璃、玻瓈、真珠、砗磲、码瑙、珊瑚、琥珀、珂贝、璧玉、奴婢、仆使、童男、童女，牛、羊、象、马、驴、骡、鸡、猪、猫、狗等兽，铜、铁、釜鍍、大小铜盘、种种杂色床敷卧具、资生所须所谓屋宅，耕田种植，贩卖市易，自手作食，自磨自舂，治身呪术，调鹰方法，仰观星宿，推步盈虚，占相男女，解梦吉凶，是男是女、非男非女，六十四能，复有十八惑人呪术，种种工巧，或说世间无量俗事，散香、末香、涂香、熏香，种种华鬘治发方术，奸伪谄曲，贪利无厌，爱乐愤闹，戏笑谈说，贪嗜鱼肉，和合毒药，治压香油，捉持宝盖及以革屣、造扇、箱篋、种种画像。积聚谷、米、大小麦、豆及诸果蓏，亲近国王、王子、大臣及诸女人，高声大笑或复默然，于诸法中多生疑惑，多语妄说长短、好丑、或善不善，好著好衣，如是种种不净之物于施主前躬自赞叹，出入游行不净之处，所谓沽酒、淫女、博弈，如是之人，我今不听在比丘中，应当休道，还俗役使，譬如莠稗，悉灭无余。”’

‘当知是等经律所制，悉是如来之所说也。若有随顺魔所说者，是魔眷属；若有随顺佛所说者，即是菩萨。

“若有说言：‘菩萨为欲供养天神故入天祠，所谓梵天、大自在天、韦⁷陀天、迦旃延天。所以入者，为欲调伏诸天入故。若言不尔，无有是处。’若言：‘菩萨不能入于外道邪论，知其威仪、文章、技艺，仆使斗争⁸不能和合，不为男女、国王、大臣之所恭敬，又亦不知和合诸药。以不知故，乃名如来。如其知者，是邪见辈。’又复：‘如来于怨、亲中，其心平等，如以刀割及香涂身，于此二人不生增益、损减之心，唯能处中，故名如来。’如是经律，当知是魔之所说也。

“若有说言：‘菩萨如是示入天祠、外学法中出家修道。示现知其威仪、礼节，能解一切文章、技艺。示入书堂、技巧之处，能善和合仆使斗争。于诸大众，童男、童女、后宫妃后、人民、长者、婆罗门等王及大臣、贫穷等中最尊最上，复为是等之所恭敬。亦能示现如是等事。虽处诸见，不生爱心，犹如莲华，不受尘垢。为度一切

⁷ 大正藏：违

⁸ 大正藏：诤（后同）

诸众生故，善行如是种种方便，随顺世法。’如是经律，当知即是如来所说。若有随顺魔所说者，是魔眷属；若能随顺佛所说者，是大菩萨。

“若有说言：‘如来为我解说经律，若恶法中轻重之罪及偷兰遮，其性皆重，我等律中终不为之。我久忍受如是之法，汝等不信，我当云何自舍己律，就汝律耶？汝所有律是魔所说，我等经律是佛所制。如来先说九部法印，如是九印印我经律。初不闻有方等经典一句一字，如来所说无量经律，何处有说方等经耶？如是等中，未曾闻有十部经名。如其有者，当知必定调达所作。调达恶人，以灭善法造方等经，我等不信。如是等经，是魔所说。何以故？破坏佛法相是非故。’如是之言：‘汝经中有，我经中无。我经律中，如来说言：“我涅槃后，恶世当有不正经律，所谓大乘方等经典。”’未来之世，当有如是诸恶比丘。我又说言：‘过九部经有方等典，若有人能了知其义，当知是人正了经律，远离一切不净之物，微妙清净犹如满月。’

“若有说言：‘如来虽为一一经律演说义味如恒沙等，我律中无，将知为无。如其有者，如来何故于我律中而不解说？是故，我今不能信

受。’当知是人则为得罪。是人复言：‘如是经律我当受持。何以故？当为我作知足少欲、断除烦恼、智慧涅槃、善法因故。’如是说者，非我弟子。

“若有说言：‘如来为欲度众生故，说方等经。’当知是人真我弟子。若有不受方等经者，当知是人非我弟子。不为佛法而出家也，即是邪见外道弟子。如是经律，是佛所说；若不如是，是魔所说。若有随顺魔所说者，是魔眷属；若有随顺佛所说者，即是菩萨。

“复次，善男子，若有说言：‘如来不为无量功德之所成就，无常变异。以得空法，宣说无我，不顺世间。’如是经律名魔所说。若有人言：‘如来正觉不可思议，亦为无量阿僧祇等功德所成。是故常住，无有变异。’如是经律是佛所说。若有随顺魔所说者，是魔眷属；若有随顺佛所说者，即是菩萨。

“复有人言：‘或有比丘，实不毁犯波罗夷罪。众人皆谓犯波罗夷，如断多罗树。’而是比丘，实无所犯。何以故？我常说言：‘四波罗夷若犯一者，犹如析石，不可还合。’若有自说得过人法，是则名为犯波罗夷。何以故？实无所得，

诈现得相故，如是之人，退失人法，是名波罗夷。

“所谓若有比丘，少欲知足，持戒清净，住空闲处。若王、大臣见是比丘，生心念言谓得罗汉，即前赞叹、恭敬、礼拜。复作是言：‘如是大师，舍是身已，当得阿耨多罗三藐三菩提。’比丘闻已，即白王言：‘我实未得沙门道果，王莫称我已得道果。惟愿大王，勿为我说不知足法。不知足者，乃至谓得阿耨多罗三藐三菩提皆默然受。我今若当默然受者，当为诸佛之所呵责。知足之行，诸佛所赞。是故，我欲终身欢乐奉修知足。又，知足者，我定自知未得道果，王称我得，我今不受，故名知足。’时，王答言：‘大师实得阿罗汉果，如佛无异。’尔时，其王普皆宣告内外人民、中宫妃后，悉令皆知得沙门果。是故，咸令一切闻者，心生敬信，供养尊重。如是比丘，真是梵行清净之人，以是因缘，普令诸人得大福德。而是比丘实不毁犯波罗夷罪。何以故？前人自生欢喜之心赞叹供养故，如是比丘当有何罪？若有说言是人得罪，当知是经是魔所说。

“复有比丘，说佛秘藏甚深经典：‘一切众生皆有佛性，以是性故，断无量亿诸烦恼结，即

得成阿耨多罗三藐三菩提⁹，除一阐提。’若王、大臣作如是言：‘比丘！汝当作佛、不作佛耶？有佛性不？’比丘答言：‘我今身中，定有佛性，成与¹⁰不成，未能审之。’王言：‘大德！如其不作一阐提者，必成无疑。’比丘言：‘尔！实如王言。’是人虽言定有佛性，亦复不犯波罗夷罪。复有比丘，即出家时，作是思惟：‘我今必定成阿耨多罗三藐三菩提。’如是之人，虽未得成无上道果，已为得福无量无边不可称计。假使有人当言：‘是人犯波罗夷！’一切比丘无不犯者。何以故？我于往昔八十亿劫，常离一切不净之物，少欲知足，威仪成就，善修如来无上法藏，亦自定知身有佛性。是故，我今得成阿耨多罗三藐三菩提，得名为佛，有大慈悲。如是经律是佛所说。若有不能随顺是者，是魔眷属；若能随顺，是大菩萨。

“复有说言：‘无四波罗夷、十三僧残、二不定法、三十舍堕、九十一堕法¹¹、四忏悔法、众多学法、七灭争¹²等，无偷兰遮、五逆等罪及一阐提。若有比丘犯如是等堕地狱者，外道之人

⁹ 大正藏：即得成于阿耨多罗三藐三菩提

¹⁰ 大正藏：以；永乐北藏及龙藏：与

¹¹ 大正藏：九十一堕；永乐北藏及龙藏：九十一堕法

¹² 大正藏：诤

悉应生天。何以故？诸外道等无戒可犯，此是如来，示现怖人，故说斯戒。’若言佛说：‘我诸比丘，若欲行淫，应舍法服，著俗衣裳，然后行淫，复应生念：“淫欲因缘，非我过咎。”如来在世，亦有比丘，习行淫欲，得正解脱，或命终后，生于天上。古今有之，非独我作。或犯四重，或犯五戒，或行一切不净律仪，犹故得具真正解脱。如来虽说，犯突吉罗如忉利天日月岁数八百万岁堕在地狱，是亦如来，示现怖人。’言波罗夷至突吉罗，轻重无差，是诸律师，妄作此言，言是佛制，必¹³定当知非佛所说。如是言说，是魔经律。

“若复说言：‘于诸戒中，若犯小戒乃至细微，当受苦报，无有齐限。’如是知己，防护自身如龟藏六。若有律师复作是言：‘凡所犯戒，都无罪报。’如是之人，不应亲近。如佛所说：‘若过一法，是名妄语，不见后世，无恶不造。’是故，不应亲近是人。我佛法中清净如是，况复有犯偷兰遮罪，或犯僧残及波罗夷而非罪耶？是故，应当深自防护如是等法。若不守护，更以何法名为禁戒？我于经中亦说有犯四波罗夷，乃至

¹³ 大正藏：毕

微细突吉罗等，应当苦治。众生若不护持禁戒，云何当得见于佛性？一切众生虽有佛性，要因持戒，然后乃见；因见佛性，得成阿耨多罗三藐三菩提。九部经中，无方等经，是故不说有佛性耳。经虽不说，当知实有。若作是说，当知是人真我弟子。”

迦叶菩萨白佛言：“世尊！如上所说一切众生有佛性者，九部经中，所未曾闻。如其说有，云何不犯波罗夷耶？”

佛言：“善男子，如汝所说，实不毁犯波罗夷罪。善男子，譬如有人，说言大海唯有七宝，无八种者，是人无罪。若有说言九部经中无佛性者，亦复无罪。何以故？我于大乘大智海中说有佛性，二乘之人所不知见，佛¹⁴故说无，无有罪也。如是境界诸佛所知，非是声闻、缘觉所及。

“善男子，若人不闻如来甚深秘密藏者，云何当知有佛性耶？何等名为秘密之藏？所谓方等大乘经典。

“善男子，有诸外道，或说我常，或说我断。如来不尔，亦说有我，亦说无我，是名中道。若有说言：‘佛说中道，一切众生悉有佛性，烦恼

¹⁴ 大正藏：是

覆故，不知不见。是故，应当勤修方便，断坏烦恼。’若有能作如是说者，当知是人犯四重；若有不作如是说者，是则名为犯波罗夷。若有说言：‘我已成就阿耨多罗三藐三菩提。何以故？以有佛性故。有佛性者，必定当成阿耨多罗三藐三菩提。以是因缘，我今已得成就菩提。’当知是人则名为犯波罗夷罪。何以故？虽有佛性，以未修习诸善方便，是故未见；以未见故，不能得成阿耨多罗三藐三菩提。善男子，以是义故，佛法甚深不可思议。”

迦叶菩萨白佛言：“世尊！有王问言：‘云何比丘堕过人法？’”

佛告迦叶：“若有比丘，为利养故，为饮食故，作诸谀谄、邪¹⁵伪、欺诈。‘云何当令诸世间人定实知我是真乞士？以是因缘，令我大得利养、名誉。’如是比丘多愚痴故，长夜常念：‘我实未得四沙门果，云何当令诸世间人谓我已得？复当云何令诸优婆塞、优婆夷等咸共指我，作如是言：‘是人福德，真是圣人。’‘如是思惟，专为求利，非为求法，行来出入，进止安庠¹⁶，执持衣钵，

¹⁵ 大正藏：奸

¹⁶ 大正藏：详

不失威仪，独坐空处如阿罗汉，令世间人咸作是言：‘如是比丘，善好第一，精勤苦行，修寂灭法。’‘以是因缘，我当大得门徒弟子，诸人亦当大致供养衣服、饮食、卧具、医药，令多女人敬念爱重。’若有比丘及比丘尼作如是事，堕过人法。

“复有比丘，为欲建立无上正法，住空闲处，非阿罗汉而欲令人谓是罗汉、是好比丘、是善比丘、寂静比丘，令无量人，生于信心。‘以此因缘，我得无量诸比丘等以为眷属，因是得教破戒比丘及优婆塞，悉令持戒。以是因缘，建立正法，光扬如来无上大义，开显方等大乘法化，度脱一切无量众生，善解如来所说经律轻重之义。’复言：‘我今亦有佛性。有经名曰如来秘藏，于是经中，我当必定得成佛道，能尽无量亿烦恼结。’广为无量诸优婆塞说言：‘汝等尽有佛性，我与汝等俱当安住如来道地，成阿耨多罗三藐三菩提，尽无量亿诸烦恼结。’作是说者，是人不知堕过人法，名为菩萨。

“若言有犯突吉罗者，忉利天上日月岁数八百万岁堕地狱中，受诸罪报。何况故犯偷兰遮罪？此大乘中，若有比丘犯偷兰遮，不应亲近。何等

名为大乘经中偷兰遮罪？若有长者，造立佛寺，以诸华鬘，用供养佛。有比丘见华贯中缕，不问辄取，名偷兰遮。若知不知，亦如是犯。若以贪心破坏佛塔，犯偷兰遮。如是之人，不应亲近。若王、大臣见塔朽故，为欲修补，供养舍利，于是塔中，或得珍宝，即寄比丘。比丘得已，自在而用，如是比丘，名为不净，多起斗争¹⁷。善优婆塞不应亲近、供养、恭敬。如是比丘，名为无根，名为二根，名不定根。不定根者，欲贪女时，身即为女；欲贪男时，身即为男。如是比丘名为恶根，不名为男，不名为女，不名出家，不名在家。如是比丘不应亲近、供养、恭敬。

“于佛法中沙门法者，应生悲心，覆育众生，乃至蚊子，应施无畏，是沙门法；远离饮酒，乃至嗅香，是沙门法；不得妄语，乃至梦中，不念妄语，是沙门法；不生欲心，乃至梦中亦复如是，是沙门法。”

迦叶菩萨白佛言：“世尊！若有比丘，梦行淫欲，是犯戒不？”

佛言：“不也。应于淫欲生臭秽想，乃至不生一念净想，远离女人、烦恼、爱想。若梦行淫，

¹⁷ 大正藏：诤

寤应生悔。比丘乞食受供养时，应如饥世食子肉想。若生淫欲，应疾舍离。如是法门，当知是佛所说经律。若有随顺魔所说者，是魔眷属；若能随顺佛所说者，是名菩萨。

“若有说言：‘常翘一脚¹⁸，寂默不言，投渊赴火，自坠高岩，不避险难，服毒断食，卧灰土上，自缚手足，杀害众生，方道呪术，旃陀罗子，无根、二根及不定根，身根不具，如是等辈¹⁹，如来悉听出家为道。’是名魔说。

“佛先听食五种牛味及以油蜜，僇奢耶衣、革屣等物。除是之外，若有说言：‘听著摩诃楞伽，一切种子悉听贮畜，草木之属皆有寿命。佛说是已便入涅槃。’若有经律作是说者，当知即是魔之所说。

“我亦不听常翘一脚，若为法故，听行、住、坐、卧。又亦不听服毒、断食、五热炙身、系缚手足、杀害众生、方道呪术、珂贝象牙以为革屣、储畜种子、草木有命、著摩诃楞伽。若言：‘世尊作如是说。’当知是为外道眷属，非我弟子。

“我唯听食五种牛味及油蜜等，听著革屣、

¹⁸ 大正藏：佛听比丘常翘一脚

¹⁹ 大正藏：辈；永乐北藏及龙藏：事

憍奢耶衣。我说四大无有寿命。若有经律作是说者，是名佛说。若有随顺佛所说者，当知是等真我弟子；若有不随佛所说者，是魔眷属；若有随顺佛经律者，当知是人是大菩萨。

“善男子，魔说、佛说差别之相，今已为汝广宣分别。”

迦叶白佛言：“世尊！我今始知魔说、佛说差别之相，因是得入佛法深义。”

佛赞迦叶：“善哉！善哉！善男子，汝能如是晓了分别，是名黠慧。”

四谛品第十²⁰

佛复告迦叶：“所言苦者，不名苦圣谛。何以故？若言苦是苦圣谛者，一切畜生及地狱众生应有圣谛。

“善男子，若复有人，不知如来甚深境界常住不变微密法身，谓是食身，非是法身；不知如来道德威力，是名为苦。何以故？以不知故，法见非法，非法见法，当知是人，必堕恶趣，轮转生死，增长诸结，多受苦恼。若有能知如来常住，无有变异，或闻常住二字音声，若一经耳，即生

²⁰ 大正藏：大般涅槃经四谛品第十

天上；后解脱时，乃能证知如来常住，无有变易。既证知已，而作是言：‘我于往昔，曾闻是义，今得解脱，方乃证知。我于本际以不知故，轮转生死，周回无穷，始于今日，乃得真智。’若如是知，真是修苦，多所利益；若不知者，虽复勤修，无所利益。是名知苦，名苦圣谛。若人不能如是修习，是名为苦，非苦圣谛。

“苦集谛者，于真法中，不生真智，受不净物，所谓奴婢，能以非法言是正法，断灭正法不令久住。以是因缘，不知法性。以不知故，轮转生死，多受苦恼，不得生天及正解脱。若有深智不坏正法，以是因缘，得生天上及正解脱。若有不知苦集谛处，而言：‘正法无有常住，悉是灭法。’以是因缘，于无量劫流转生死，受诸苦恼。若能知法常住不异，是名知集，名集圣谛。若人不能如是修习，是名为集，非集圣谛。

“苦灭谛者，若有多修习学空法，是为不善。何以故？灭一切法故，坏于如来真法藏故，作是修学，是名修空。修苦灭者，逆于一切诸外道等。若言修空是灭谛者，一切外道亦修空法，应有灭谛。若有说言：‘有如来藏，虽不可见，若能灭除一切烦恼，尔乃得入。’若发此心，一念因缘，

于诸法中，而得自在。若有修习如来密藏无我、空寂，如是之人，于无量世，在生死中流转受苦。若有不作如是修者，虽有烦恼，疾能灭除。何以故？因知如来秘密藏故，是名苦灭圣谛。若能如是修习灭者，是我弟子；若有不能作如是修，是名修空，非灭圣谛。

“道圣谛者，所谓佛、法、僧宝及正解脱。有诸众生颠倒心，言：‘无佛、法、僧及正解脱，生死流转，犹如幻化。’修习是见，以此因缘，轮转三有，久受大苦。若能发心，见于如来常住无变，法、僧解脱亦复如是。乘此一念，于无量世，自在果报，随意而得。何以故？我于往昔，以四倒故，非法计法，受于无量恶业果报；我今已²¹灭如是见故，成佛正觉，是名道圣谛。若有人言：‘三宝无常。’修习是见是虚妄修，非道圣谛。

若修是法为常住者，是我弟子。真见修习四圣谛法，是名四圣谛。”

迦叶菩萨白佛言：“世尊！我今始知修习甚深四圣谛法。”

²¹ 大正藏：已；永乐北藏及龙藏：以

四倒品第十一²²

佛复告迦叶²³：“谓四倒者²⁴，于非苦中生于苦想，名曰颠倒。非苦者，名为如来。生苦想者，谓诸如来无常变异。若说如来是无常者，名大罪苦。若言：‘如来舍此苦身，入于涅槃，如薪尽火灭。’是名非苦而生苦想，是名颠倒。‘我若说言如来常者，即是我见。以我见故，有无量罪。是故应说如来无常。如是说者，我则受乐。’如来无常，即为是苦。若是苦者，云何生乐？以于苦中生乐想故，名为颠倒。

“乐生苦想，名为颠倒。乐者，即是如来；苦者，如来无常。若说如来是无常者，是名乐中生于苦想。

“如来常住，是名为乐。‘若我说言如来是常，云何复得入于涅槃？若言如来非是苦者，云何舍身而取灭度？’以于乐中生苦想故，名为颠倒。是名初倒。

“无常常想，常无常想，是名颠倒。无常者，名不修空。不修空故，寿命短促。若有说言不修

²² 大正藏：大般涅槃经四倒品第十一

²³ 大正藏：佛告迦叶

²⁴ 大正藏：善男子，谓四倒者

空寂得长寿者，是名颠倒。是名第二颠倒。

“无我我想，我无我想，是名颠倒。世间之人，亦说有我；佛法之中，亦说有我。世间之人虽说有我，无有佛性，是则名为于无我中而生我想，是名颠倒。佛法有我即是佛性，世间之人说佛法无我，是名我中生无我想。若言：‘佛法必定无我，是故如来勅诸弟子修习无我。’名为颠倒。是名第三颠倒。

“净不净想，不净净想，是名颠倒。净者即是如来常住，非杂食身，非烦恼身，非是肉身，非是筋骨系缚之身。若有说言‘如来无常，是杂食身，乃至筋骨系缚之身，法、僧解脱是灭尽’者，是名颠倒。不净净想，名颠倒者，若有说言：‘我此身中，无有一法是不净者，以无不净定当得入清净之处，如来所说修不净观，如是之言，是虚妄说。’是名颠倒。是则名为第四颠倒。”

迦叶菩萨白佛言：“世尊！我从今日始得正见。世尊！自是之前，我等悉名邪见之人。”

大般涅槃经卷第七

大般涅槃经卷第八

北凉天竺三藏昙无讖译 梵

宋沙门慧严慧观同谢灵运再治

如来性起品第十二²⁵

迦叶白佛言：“世尊！二十五有，有我不耶²⁶？”

佛言：“善男子，我者，即是如来藏义。一切众生悉有佛性，即是我义。如是我义，从本已来，常为无量烦恼所覆，是故众生不能得见。

“善男子，如贫女人，舍内多有真金之藏，家人大小无有知者。时，有异人善知方便，语贫女言：‘我今雇汝，汝可为我耘除草秽。’女人²⁷答言：‘我今不能。汝若能示我子金藏，然后乃当速为汝作。’是人答²⁸言：‘我知方便，能示汝子。’女人复²⁹言：‘我家大小尚自不知，况汝能知？’是人答³⁰言：‘我今审能。’女人复³¹言：‘我亦欲见，并可示我。’是人即于其家掘出金藏。女人

²⁵ 大正藏：如来性品第十二

²⁶ 大正藏：耶；永乐北藏及龙藏：邪

²⁷ 大正藏：即；永乐北藏及龙藏：人

²⁸ 大正藏：复；永乐北藏及龙藏：答

²⁹ 大正藏：答；永乐北藏及龙藏：复

³⁰ 大正藏：复；永乐北藏及龙藏：答

³¹ 大正藏：答；永乐北藏及龙藏：复

见已，心生欢喜，起³²奇特想，宗仰是人。

“善男子，众生佛性亦复如是，一切众生不能得见，如彼宝藏，贫人不知。善男子，我今普示一切众生所有佛性，为诸烦恼之所覆蔽，如彼贫人有真金藏不能得见。如来今日普示众生诸觉宝藏，所谓佛性。一切众生见是事已，心生欢喜，归仰如来。善方便者，即是如来；贫女人者，即是一切无量众生；真金藏者，即佛性也。

“复次，善男子，譬如女人，生育一子，婴孩得病，是女愁恼，求觅良医。良医既至，合三种药酥、乳、石蜜，与之令服。因告女人：‘儿服药已，且莫与乳。须药消已，尔乃与之。’是时，女人即以苦味用涂其乳，语其儿言：‘我乳毒涂，不可复触。’其³³儿渴乏，欲得母乳，闻乳毒气，便远舍去。至其药消，母乃洗乳，唤子与之。是时，小儿虽复饥渴，先闻毒气，是故不来。母复语言：‘为汝服药，故以毒涂。汝药已消，我已洗竟，汝便可来饮乳无苦。’其儿闻已，渐渐还饮。

“善男子，如来亦尔，为度一切，教诸众生

³² 大正藏：生；永乐北藏及龙藏：起

³³ 大正藏：小；永乐北藏及龙藏：其

修无我法。如是修已，永断我心，入于涅槃。为除世间诸妄见故，示现出过世间法故，复示世间计我虚妄非真实故，修无我法清净身故。譬如女人，为其子故，以苦味涂乳。如来亦尔，为修空故，说言诸法悉无有我。如彼女人，净洗乳已，而唤其子，欲令还饮³⁴。我今亦尔，说如来藏。是故，比丘不应生怖。如彼小儿，闻母唤已，渐还饮乳；比丘亦尔，应自分别如来秘藏，不得不有。”

迦叶菩萨白佛言：“世尊！实无有我。何以故？婴儿生时，无所知晓。若有我者，即生之日，寻应有知。以是义故，定知无我。若定有我，受生已后，应无终没。若使一切皆有佛性，是常住者，应无坏相。若无坏相，云何而有刹利、婆罗门、毗舍、首陀，及旃陀罗、畜生差别？今见业缘种种不同，诸趣各异。若定有我，一切众生应无胜负。以是义故，定知佛性非是常法。若言佛性定是常者，何缘复说有杀、盗、淫、两舌、恶口、妄言、绮语、贪、恚、邪见？若我性常，何故酒后荒醉迷乱？若我性常，盲应见色，聋应闻声，瘖应能语，拘躄能行。若我性常，不应避于

³⁴ 大正藏：服；永乐北藏及龙藏：饮

火坑、大水、毒药、刀剑、恶人、禽兽。若我常者，本所更事不应忘失。若不忘失，何缘复言：‘我曾何处见是人耶？’若我常者，则不应有老少盛衰、忆念往事。若我常者，止住何处？为在涕唾青、黄、赤、白诸色中耶？若我常者，应遍身中，如胡麻油间无空处。若断身时，我亦应断。”

佛告迦叶：“善男子，譬如王家有大力士，其人眉间有金刚珠，与余力士角³⁵力相扑，而彼力士以头触之，其额上珠寻没肤中，都不自知是珠所在。其处有疮，即命良医欲自疗治。时有明医，善知方药，即知是疮因珠入体，是珠入皮即便停住。是时，良医寻问力士：‘卿额上珠为何所在？’力士惊答：‘大师医王，我额上珠乃失³⁶去耶？是珠今者，为何所在？将非幻化？’忧愁啼哭。是时，良医慰喻力士：‘汝今不应生大愁苦。汝因斗时，宝珠入体，今在皮里，影现于外。汝等斗时，瞋恚毒盛，珠陷入体，故不自知。’是时，力士不信医言：‘若在皮里，脓血不净，何缘不出？若在筋里，不应可见。汝今云何欺诳于我？’时，医执镜以照其面，珠在镜中明了显

³⁵ 大正藏：掬；永乐北藏及龙藏：角

³⁶ 大正藏：失；永乐北藏及龙藏：无

现。力士见已，心怀惊怪，生奇特想。

“善男子，一切众生亦复如是，不能亲近善知识故，虽有佛性皆不能见，而为贪、淫、瞋恚、愚痴之所覆蔽，故堕地狱、畜生、饿鬼、阿修罗、旃陀罗、刹利、婆罗门、毗舍、首陀，生如是等种种家中。因心所起种种业缘，虽受人身，聋盲瘖症，拘躄癯跛，于二十五有受诸果报，贪淫、瞋恚、愚痴覆心，不知佛性。如彼力士，宝珠在体，谓呼失去。众生亦尔，不知亲近善知识故，不识如来微密宝藏，修学无我。譬如非圣，虽说有我，亦复不知我之真性。我诸弟子亦复如是，不知亲近善知识故，修学无我，亦复不知无我之处。尚自不知无我真性，况复能知有我真性？”

“善男子，如来如是说诸众生皆有佛性，譬如良医示彼力士金刚宝珠。是诸众生，为无量亿诸烦恼等之所覆蔽，不识佛性。若尽烦恼，尔时，乃得证知明了，如彼力士，于明镜中，见其宝珠³⁷。善男子，如来秘藏如是无量不可思议。

“复次，善男子，譬如雪山，有一味药，名曰乐味，其味极甜，在深丛下，人无能见。有人闻香，即知其地当有是药。过去世中，有转轮王，

³⁷ 大正藏：于明镜中见其宝珠；永乐北藏及龙藏：于净镜中见其宝后

于彼雪山为此药故，在在处处，造作木笥，以接是药。是药熟时，从地流出，集木笥中，其味真正。王既没已，其后是药，或醋、或醎、或甜、或苦、或辛、或淡。如是一味，随其流处，有种种异，是药真味，停留在山，犹如满月，凡人薄福，虽以掘凿加功苦至而不能得。复有圣王，出现于世，以福因缘，即得是药真正之味。

“善男子，如来秘藏，其味亦尔，为诸烦恼丛林所覆，无明众生，不能得见。药一味者³⁸，譬如佛性，以烦恼故，出种种味，所谓地狱、畜生、饿鬼、天、人、男女、非男非女、刹利、婆罗门、毗舍、首陀。佛性雄猛，难可毁坏，是故无有能杀害者。若有杀者，则断佛性，如是佛性终不可断。性若可断，无有是处。如我性者，即是如来秘密之藏。如是秘藏，一切无能毁坏烧灭。虽不可坏，然不可见，若得成就阿耨多罗三藐三菩提，尔乃证知。以是因缘，无能杀者。”

迦叶菩萨复白佛言：“世尊！若无杀者，应当无有不善之业。”

佛告迦叶：“实有杀生。何以故？善男子，众生佛性住五阴中，若坏五阴，名曰杀生。若有

³⁸ 大正藏：药一味者；永乐北藏及龙藏：一味者

杀生即堕恶趣，以业因缘，而有刹利、婆罗门等、毗舍、首陀、及旃陀罗、若男若女、非男非女，二十五有差别之相，流转生死。非圣之人，横计于我，大小诸相犹如稗子，或如米豆，乃至拇³⁹指，如是种种妄生忆想，妄想之相无有真实。出世我相名为佛性，如是计我，是名最善。

“复次，善男子，譬如有人，善知伏藏，即取利镵，掘地直下。盘石沙砾，直过无难；唯至金刚，不能穿彻。夫金刚者，所有刀斧不能破坏。善男子，众生佛性亦复如是，一切论者、天魔波旬及诸人天，所不能坏。五阴之相即是起作，起作之相，犹如石沙，可穿可坏。佛性真我，譬如金刚，不可毁坏。以是义故，坏五阴者，名为杀生。善男子，必定当知佛法如是不可思议。

“善男子，方等经者，犹如甘露，亦如毒药。”

迦叶菩萨复白佛言：“如来何缘说方等经，譬如甘露，亦如毒药？”

佛言：“善男子，汝今欲知如来秘藏真实义不？”

迦叶白言：“我今实欲得知如来秘藏之义。”

尔时，世尊而说偈言：

³⁹ 大正藏：母；永乐北藏及龙藏：拇

或有服甘露 伤命而早夭
或复服甘露 寿命得长存
或有服毒生 有缘服毒死
无阂⁴⁰智甘露 所谓大乘典
如是大乘典 亦名杂毒药
如酥醍醐等 及以诸石蜜
服消则为药 不消则为毒
方等亦如是 智者为甘露
愚不知佛性 服之则成毒
声闻及缘觉 大乘为甘露
犹如诸味中 乳最为第一
如是懃进者 依因于大乘
得至于涅槃 成人中象王
众生知佛性 犹如迦叶等
无上甘露味 不生亦不死
迦叶汝今当 善分别三归
如是三归性 则是我之性
若能谛观察 我性有佛性
当知如是人 得入秘密藏
知我及我所 是人已出世
佛法三宝性 无上第一尊

⁴⁰ 大正藏：碍；永乐北藏及龙藏：阂

如我所说偈 其性义如是
尔时，迦叶复说偈言：

我今都不知 归依三宝处
云何当归趣 无上无所畏
不知三宝处 云何作无我
云何归佛者 而得于安慰
云何归依法 惟愿为我说
云何得自在 云何不自在
云何归依僧 转得无上利
云何真实说 未来成佛道
未来若不成 云何归三宝
我今无预知 当行次第依
云何未怀妊 而作生子想
若必在胎中 则名为有子
子若在胎中 定当生不久
是名为子义 众生业亦然
如佛之所说 愚者不能知
以其不知故 轮回生死狱
假名优婆塞 不知真实义
惟愿广分别 除断我疑网
如来大智慧 唯垂哀分别
愿说于如来 秘密之宝藏

迦叶汝当知 我今当为汝
善开微密藏 令汝疑得断
今当至心听 汝于诸菩萨
则与第七佛 同其一名号
归依于佛者 真名优婆塞
终不更归依 其余诸天神
归依于法者 则离于杀害
归依圣僧者 不求于外道
如是归三宝 则得无所畏
迦叶白佛言 我亦归三宝
是名为正路 诸佛之境界
三宝平等相 常有大智性
我性及佛性 无二无差别
是道佛所赞 正进安止处
亦名正遍见 故为佛所称
我亦趣善逝 所赞无上道
是最为甘露 诸有所无有

尔时，佛告迦叶菩萨：“善男子，汝今不应如诸声闻、凡夫之人分别三宝，于此大乘无有三归分别之相。所以者何？于佛性中即有法、僧，为欲化度声闻凡夫故，分别说三宝异相。善男子，若欲随顺世间法者，则应分别有三归依。

“善男子，菩萨应作如是思惟：‘我今此身归依于佛。若即此身得成佛道，既成佛已，不当恭敬、礼拜、供养于诸世尊。何以故？诸佛平等，等为众生作归依故。若欲尊重法身舍利，便应礼敬诸佛塔庙。所以者何？为欲化度诸众生故，亦令众生于我身中起塔庙想，礼拜供养。如是，众生以我法身为归依处。一切众生皆依非真邪伪之法，我当次第为说真法；又有归依非真僧者，我当为作依真僧处；若有分别三归依者，我当为作一归依处，无三差别；于生盲众为作眼目；复当为诸声闻、缘觉作真归处。’善男子，如是，菩萨为无量恶诸众生等及诸智者而作佛事。

“善男子，譬如有人，临阵战时，即生心念：‘我于是中，最为第一；一切兵众，悉依恃我。’亦如太⁴¹子如是思惟：‘我当调伏其余王子，绍继大王帝王之业而得自在，令诸王子悉见归依。’是故，不应生下劣心。如王，王子、大臣亦尔。善男子，菩萨摩訶萨亦复如是，作是思惟：‘云何三事与我一体？’善男子，我示三事，即是涅槃。如来者，名无上士，譬如人身，头最为上，

⁴¹ 大正藏：大；永乐北藏及龙藏：太

非余肢⁴²节、手、足等也。佛亦如是，最为尊上，非法、僧也。为欲化度诸世间故，种种示现差别之相，如彼梯陞⁴³。是故，汝今不应受持如凡愚人所知三归差别之相，汝于大乘，猛利决断，应如刚刀。”

迦叶菩萨白佛言：“世尊！我知故问，非为不知。我为菩萨大勇猛者，问于无垢清净行处，欲令如来为诸菩萨广宣分别奇特之事，称扬大乘方等经典。如来大悲今已善说，我亦如是安住其中所说菩萨清净行处，即是宣说《大涅槃经》。世尊！我今亦当广为众生，显扬如是如来秘藏，亦当证知真三归处。若有众生，能信如是《大涅槃经》，其人则能自然了达三归依处。何以故？如来秘藏有佛性故。其有宣说是经典者，皆言身中尽有佛性，如是之人，则不远求三归依处。何以故？于未来世，我身即当成就三宝。是故，声闻、缘觉之人及余众生，皆依于我，恭敬礼拜。”

“善男子，以是义故，应当正学大乘经典。”

迦叶复言：“佛性如是不可思议，三十二相、八十种好亦不可思议。”

⁴² 大正藏：支；永乐北藏及龙藏：肢

⁴³ 大正藏：橙；永乐北藏及龙藏：陞

尔时，佛赞迦叶菩萨：“善哉！善哉！善男子，汝已成就深利智慧，我今当更善为汝说入如来藏。

“若我住者，即是常法，不离于苦；若无我者，修行净行无所利益。若言诸法皆无有我，是即断见；若言我住，即是常见。若言一切行无常者，即是断见；诸行常者，复是常见。若言苦⁴⁴者，即是断见；若言乐者，复是常见。修一切法常者，堕于断见；修一切法断者，堕于常见。如步屈虫，要因前脚得移后足；修常、断者亦复如是，要因断、常。以是义故，修余法苦者，皆名不善；修余法乐者，则名为善。修余法无我者，是诸烦恼分；修余法常者，是则名曰如来秘藏，所谓涅槃无有窟宅。修余无常法者，即是财物；修余常法者，谓佛、法、僧及正解脱。当知如是佛法中道，远离二边而说真法。凡夫愚人于中无疑，如羸病人服食酥已，气力轻便。有无之法，体性不定。譬如四大，其性不同，各自违反，良医善知，随其偏发而消息之。善男子，如来亦尔，于诸众生犹如良医，知诸烦恼体相差别而为除断，开示如来秘密之藏，清净佛性常住不变。

⁴⁴ 大正藏：苦；永乐北藏：苦；龙藏：若

“若言有者，智不应染；若言无者，即是妄语。若言有者，不应默然，亦复不应戏论诤讼，但求了知诸法真性。凡夫之人，戏论诤讼，不解如来微密藏故。若说于苦，愚人便谓：‘身是无常。’说一切苦，复不能知身有乐性。说无常者，凡夫之人计一切身皆是无常，譬如瓦坏。有智之人应当分别，不应尽言一切无常。何以故？我身即有佛性种子。若说无我，凡夫当谓：‘一切佛法悉无有我。’智者应当分别无我假名不实，如是知己，不应生疑。若言如来秘藏空寂，凡夫闻之生断灭见；有智之人应当分别如来是常，无有变易。若言解脱譬如幻化，凡夫当谓：‘得解脱者⁴⁵即是磨灭。’有智之人，应当分别，人中师子虽有去来，常住无变。若言无明因缘诸行，凡夫之人闻已，分别生二法想，明与无明；智者了达其性无二，无二之性即是实性。若言诸行因缘识者，凡夫谓二，行之与识；智者了达其性无二，无二之性即是实性。若言十善十恶可作不可作，善道恶道，白法黑法，凡夫谓二；智者了达其性无二，无二之性即是实性。若言应修一切法苦，凡夫谓二；智者了达其性无二，无二之性即是实

⁴⁵ 大正藏：得真解脱；永乐北藏及龙藏：得解脱者

性。若言一切行无常者⁴⁶，如来秘藏亦是无常，凡夫谓二；智者了达其性无二，无二之性即是实性。若言一切法无我，如来秘藏亦无有我，凡夫谓二；智者了达其性无二，无二之性即是实性。我与无我，性无有二，如来秘藏其义如是。不可称计无量无边诸佛所赞，我今于是一切功德成就，经中皆悉说已。

“善男子，我与无我，性相无二，汝应如是受持顶戴。

“善男子，汝亦应当坚持忆念如是经典，如我先于《摩诃般若波罗蜜经》中说：‘我、无我，无有二相。’如因乳生酪，因酪得生酥，因生酥得熟酥，因熟酥得醍醐，如是酪性，为从乳生？为从自生？从他生耶？乃至醍醐亦复如是。若从他生，即是他作，非是乳生；若非乳生，乳无所为。若自生者，不应相似相续而生；若相续生则不俱生；若不俱生，五种之味则不一时；虽不一时，定复不从余处来也。当知乳中先有酪相，甘味多故，不能自变；乃至醍醐亦复如是。是牛食啖⁴⁷水草因缘，血脉转变而得成乳。若食甘草，

⁴⁶ 大正藏：若言一切行无常者；永乐北藏及龙藏：若言一切行无常

⁴⁷ 大正藏：噉

其乳则甜；若食苦草，乳则苦味。雪山有草，名曰肥膩，牛若食者，纯得醍醐，无有青、黄、赤、白、黑色。谷草因缘，其乳则有色味之异。是诸众生以明、无明业因缘故，生于二相，若无明转，则变为明。一切诸法善、不善等，亦复如是，无有二相。”

迦叶菩萨白佛言：“世尊！如佛所说乳中有酪，是义云何？世尊！若言乳中定有酪相，以微细故不可见者，云何说言从乳因缘而生于酪？法若本无，则名为生；如其已有，云何言生？若言乳中定有酪相，百草之中亦应有乳，如是乳中亦应有草。若言乳中定无酪者，云何因乳而得生酪？若法本无而后生者，何故乳中不生于草？”

“善男子，不可定言乳中有酪、乳中无酪，亦不可说从他而生。若言乳中定有酪者，云何而得体味各异？是故，不可说言乳中定有酪性。若言乳中定无酪者，乳中何故不生兔角？置毒乳中，酪则杀人。是故，不可说言乳中定无酪性。若言是酪从他生者，何故水中不生于酪？是故，不可说言酪从他生。善男子，是牛食啖草因缘故，血则变白；草血灭已，众生福力变而成乳。是乳虽从草血而出，不得言二，唯得名为从因缘生，酪

至醍醐亦复如是。以是义故，得名牛味。是乳灭已，因缘成酪。何等因缘？若酵若暖⁴⁸，是故得名从因缘有，乃至醍醐亦复如是。是故，不得定言乳中无有酪相、从他生者，离乳而有，无有是处。

“善男子，明与无明，亦复如是。若与烦恼诸结俱者，名为无明；若与一切善法俱者，名之为明。是故，我言无有二相。以是因缘，我先⁴⁹说言：‘雪山有草，名曰肥膩，牛若食者，即成醍醐。’佛性亦尔。善男子，众生薄福，不见是草；佛性亦尔，烦恼覆故，众生不见。譬如大海，虽同一鹹，其中亦有上妙之水，味同于乳。譬如雪山，虽复成就种种功德，多生诸药，亦有毒草。诸众生身亦复如是，虽有四大毒蛇之种，其中亦有妙药大王，所谓佛性，非是作法，但为烦恼客尘所覆。若刹利、婆罗门、毗舍、首陀能断除者，即见佛性，成无上道。

“譬如虚空，震雷起云，一切象牙上皆生华。若无雷震，华则不生，亦无名字。众生佛性亦复如是，常为一切烦恼所覆，不可得见。是故，我

⁴⁸ 大正藏：若酢若暖；永乐北藏及龙藏：若酵若暖

⁴⁹ 大正藏：先；永乐北藏及龙藏：上

说众生无我。若得闻是大般涅槃微妙经典，则见佛性如象牙华。虽闻契经一切三昧，不闻是经，不知如来微妙之相，如无雷时，象牙上华不可得见。闻是经已，即知一切如来所说秘藏佛性，譬如天雷见象牙华。闻是经已，即知一切无量众生皆有佛性。以是义故，说《大涅槃》名为如来秘密之藏。增长法身，犹如雷时，象牙上华。以能长养如是大义故，得名为‘大般涅槃’。若有善男子、善女人，有能习学是大涅槃微妙经典，当知是人，能报佛恩，真佛弟子。”

迦叶菩萨白佛言：“甚奇！世尊！所言佛性甚深甚深，难见难入，声闻、缘觉所不能解⁵⁰。”

佛言：“善男子，如是如是，如汝所叹，不违我说。”

迦叶菩萨白佛言：“世尊！佛性者，云何甚深难见难入？”

佛言：“善男子，如百盲人，为治目故，造诣良医。是时，良医即以金錡抉⁵¹其眼膜⁵²，以一指示问言：‘见不？’盲人答言：‘我犹未见。’复以二指、三指示之，乃言：‘少见。’善男子，

⁵⁰ 大正藏：解；永乐北藏及龙藏：报

⁵¹ 大正藏：决；永乐北藏及龙藏：扶

⁵² 大正藏：膜；永乐北藏及龙藏：膜

是大涅槃微妙经典，如来未说亦复如是，无量菩萨虽具足行诸波罗蜜乃至十住，犹未能见所有佛性，如来既说即便少见。是菩萨摩訶萨既得见已，咸作是言：‘甚奇！世尊！我等流转无量生死，常为无我之所惑乱。’善男子，如是菩萨位阶十地，尚不明了知见佛性，何况声闻、缘觉之人能得见耶？

“复次，善男子，譬如远⁵³观虚空鹅雁，为是虚空？为是鹅雁？谛观不已，仿佛⁵⁴见之。十住菩萨于如来性知见少分亦复如是，况复声闻、缘觉之人而能知见？

“善男子，譬如醉人，欲涉远路，矇眊见道。十住菩萨，于如来性知见少分，亦复如是。

“善男子，譬如渴人，行于旷⁵⁵野，是人渴逼，遍行求水，见有丛树，树有白鹤。是人迷闷，不能分别是树是水，谛观不已，乃见白鹤及以丛树。善男子，十住菩萨，于如来性知见少分，亦复如是。

“善男子，譬如有人，在大海中，乃至无量百千由旬远望大舶、楼櫓、堂阁，即作是念：‘彼

⁵³ 大正藏：仰；永乐北藏及龙藏：远

⁵⁴ 大正藏：髣髴；永乐北藏及龙藏：仿佛

⁵⁵ 大正藏：圻

是楼橹？为是虚空？’久视乃生必定之心，知是楼橹。十住菩萨，于自身中见如来性，亦复如是。

“善男子，譬如王子，身极懦弱，通夜游戏至明旦，目视一切悉不明了。十住菩萨，虽于己身见如来性，亦复如是，不大明了。

“复次，善男子，譬如臣吏，王事所拘，逼夜还家，电明暂发，因见牛聚，即作是念：‘为是牛群？为云？为舍？’是人久视，虽生牛想，犹不审定。十住菩萨，虽于己身见如来性，未能审定亦复如是。

“复次，善男子，如持戒比丘，观无虫水而见虫相，即作是念：‘此中动者，为是虫耶？是尘土耶？’久视不已，虽知是尘，亦不明了。十住菩萨，于己身中见如来性，亦复如是，不大明了。

“复次，善男子，譬如有人，于阴闇中远见小儿，即作是念：‘彼为是牛？为人？为鸟耶？’久视⁵⁶不已，虽见小儿，犹不明了。十住菩萨，于己身中见如来性，亦复如是，不大明了。

“复次，善男子，譬如有人，于夜闇中，见画菩萨，即作是念：‘是菩萨像、自在天像、大

⁵⁶ 大正藏：观

梵天像成染衣耶？’是人久视⁵⁷，虽复意谓是菩萨像，亦不明了。十住菩萨，于己身中见如来性，亦复如是，不大明了。

“善男子，所有佛性如是甚深，难得知见，唯佛能知，非诸声闻、缘觉所及。善男子，智者应作如是分别，知如来性。”

迦叶菩萨白佛言：“世尊！佛性如是微细难知，云何肉眼而能得见？”

佛告迦叶：“善男子，如非想非非想天亦非二乘所能得知，随顺契经，以信故知。

“善男子，声闻、缘觉信顺如是《大涅槃经》，自知己身有如来性亦复如是。善男子，是故应当精勤修习《大涅槃经》。善男子，如是佛性唯佛能知，非诸声闻、缘觉所及。”

迦叶菩萨白佛言：“世尊！非圣凡夫有众生性，皆说有我。”

佛言：“譬如二人，共为亲友，一是王子、一是贫贱。如是二人互相往反⁵⁸。是时，贫人见是王子有一好刀，净妙第一，心中贪著。王子后时，执持是刀，逃至他国。贫人于后，寄宿他家，

⁵⁷ 大正藏：观

⁵⁸ 大正藏：返

即于眠中寤言：‘刀！刀！’旁⁵⁹人闻之，收至王所。时，王问言：‘汝言刀者，可以示我。’是人具以上事答王：‘王今设使屠割臣身，分裂手足，欲得刀者，实不可得。臣与王子素为亲厚，先共一处，虽曾眼见，乃至不敢以手振触，况当故取？’王复问言：‘卿所见刀，相貌何类？’答言：‘大王，臣⁶⁰所见者，如羖羊角。’王闻是已，欣然而笑，语言：‘汝今随意所至，莫生忧怖。我库藏中，都无是刀，况汝乃于王子边见？’时，王即问诸群臣言：‘汝等曾见如是刀不？’言已便崩，寻立余子绍继王位，复问群臣：‘汝等曾于官库藏中，见是刀不？’诸臣答言：‘臣等曾见。’又复问言：‘其状何似？’答言：‘大王，如羖羊角。’王言：‘我库藏中，何缘当有如是相刀？’次第四王皆悉检校⁶¹，求索不得。却后数时，先逃王子，从他国还归其本土，复得为王。既登王位，复问诸臣：‘汝见刀不？’答言：‘大王，臣等皆见。’又复问言：‘其状何似？’答言：‘大王，其色清净如优钵罗华。’复有答言：‘形如羊角。’复有答言：‘其色红赤，犹如火聚。’复有答言：

⁵⁹ 大正藏：傍

⁶⁰ 大正藏：臣；永樂北藏及龍藏：我

⁶¹ 大正藏：检校

‘犹如黑蛇。’时，王大笑：‘卿等皆悉不见我刀真实之相。’

“善男子，菩萨摩訶萨亦复如是，出现于世说我真相，说已舍去，譬如王子，持净妙刀，逃至他国。凡夫愚人说言：‘一切有我有我。’如彼贫人，止宿他舍，寤言：‘刀！刀！’声闻、缘觉问诸众生：‘我有何相？’答言：‘我见我相大如拇⁶²指。’或言如米，或如稗子。有言：‘我相住在心中，炽然如日。’如是众生，不知我相，譬如诸臣，不知刀相。菩萨如是说于我法，凡夫不知种种分别，妄作我相，如问刀相，答似羊角。是诸凡夫，次第相续而起邪见，为断如是诸邪见故，如来示现说于无我，譬如王子语诸臣言：‘我库藏中，无如是刀。’

“善男子，今日如来所说真我，名曰佛性，如是佛性，我佛法中，譬如净刀。善男子，若有凡夫能善说者，即是随顺无上佛法。若有善能分别随顺宣说是者，当知即是菩萨相貌。”

⁶² 大正藏：母

文字品第十三⁶³

佛复告迦叶：“所有种种异论、呪术、言语、文字皆是佛说，非外道说。”

迦叶菩萨白佛言：“世尊！云何如来说字根本？”

佛言：“善男子，初说半字以为根本，持诸记论、呪术、文章、诸阴实法。凡夫之人学是字本，然后能知是法非法。”

迦叶菩萨复白佛言：“世尊！所言字者，其义云何？”

“善男子，有十四音名为字义。所言字者，名曰涅槃，常故不流；若不流者，则为无尽；夫无尽者，即是如来金刚之身。

“是十四音名曰字本。阿_短者⁶⁴，不破坏故；不破坏者，名曰三宝，譬⁶⁵如金刚。又复，阿者，不流故；不流者，即是如来。如来九孔无所流故，是故不流。又，无九孔，是故不流，不流即常，常即如来，如来无作，是故不流。又复阿者，名为功德；功德者，即是三宝，是故名阿。

⁶³ 大正藏：大般涅槃经文字品第十三

⁶⁴ 大正藏：短阿者；永乐北藏及龙藏：阿（短）者

⁶⁵ 大正藏：喻

“次阿^{长呼}者⁶⁶，名阿阇黎⁶⁷。阿阇黎者，义何谓耶？于世间中得名圣者。何谓为圣？圣名无著，少欲知足，亦名清净，能度众生于三有流生死大海，是名为圣。又复阿者，名曰制度，修持净戒，随顺威仪。又复阿者，名依圣人，应学威仪进止举动，供养、恭敬、礼拜三尊，孝养父母及学大乘。善男女等具持禁戒及诸菩萨摩訶萨等，是名圣人。又复阿者，名曰教诲，如言：‘汝等⁶⁸如是应作，如是莫作。’若有能遮非威仪法，是名圣人，是故名阿。

“伊^{短呼}者⁶⁹，即是佛法，梵行广大，清净无垢，譬如满月。汝等如是应作、不作，是义、非义，此是佛说、此是魔说，是故名伊。

“伊^{长呼}者⁷⁰，佛法微妙，甚深难得。如自在天、大梵天王，法名自在，若能持者，则名护法。又，自在者，名四护世。是四自在则能摄护《大涅槃经》，亦能自在敷扬宣说。又复伊者，能为众生自在说法。复次，伊者为自在故说，何等是耶？所谓修习方等经典。复次，伊者为断嫉妬，如除

⁶⁶ 大正藏：长阿者；永乐北藏及龙藏：阿（长呼）者

⁶⁷ 大正藏：梨

⁶⁸ 大正藏：等；永乐北藏及龙藏：来

⁶⁹ 大正藏：短伊者；永乐北藏及龙藏：伊（短呼）者

⁷⁰ 大正藏：长伊者；永乐北藏及龙藏：伊（长呼）者

稗秽，皆悉能令变成吉祥，是故名伊。

“忧^{短呼}者⁷¹，于诸经中最上、最胜、增长上上，谓大涅槃。复次，忧者，如来之性，声闻、缘觉所未曾闻。如一切处，北郁单越最为殊胜；菩萨若能听受是经，得名最上最胜⁷²，是故名忧。

“忧^长者⁷³，譬如牛乳，诸味中上；如来之性，亦复如是，于诸经中最尊、最上。若有诽谤，当知是人，与牛无别。复次，忧者，是人名为无慧正念，诽谤如来微密秘藏，当知是人，甚可怜悯，远离如来秘密之藏，说无我法，是故名忧。

“唵者，即是诸佛法性涅槃，是故名唵。

“鬘⁷⁴者，谓如来义。复次，鬘者，如来进止、屈伸⁷⁵、举动无不利益一切众生，是故名鬘。

“乌者，名烦恼义。烦恼者，名曰诸漏。如来永断一切烦恼，是故名乌。

“炮者，谓大乘义，于十四音是究竟义。大乘经典亦复如是，于诸经论最为究竟，是故名炮。

“菴者，能遮一切诸不净物，于佛法中能舍一切金银宝物，是故名菴。

⁷¹ 大正藏：短忧者；永乐北藏及龙藏：忧（短呼）者

⁷² 大正藏：于一切众最上最胜；永乐北藏及龙藏：得名最上最胜

⁷³ 大正藏：长忧者；永乐北藏及龙藏：忧（长）者

⁷⁴ 大正藏：野；永乐北藏及龙藏：野

⁷⁵ 大正藏：申；永乐北藏及龙藏：伸

“痾者，名胜乘义。何以故？此大乘典《大涅槃经》于诸经中最为殊胜，是故名痾^{安饿切}。

“迦者，于诸众生起大慈悲，生于子想，如罗睺罗，作妙善义，是故名迦。

“佉者，名非善友。非善友者，名为杂秽。不信如来秘密之藏，是故名佉。

“伽者，名藏。藏者，即是如来秘藏。一切众生皆有佛性，是故名伽。

“伽^{重音}者⁷⁶，如来常音。何等名为如来常音？所谓如来常住不变，是故名伽。

“俄者，一切诸行破坏之相，是故名俄。

“遮者，即是修义。调伏一切诸众生故，名为修义，是故名遮。

“车者，如来覆荫一切众生，譬如大盖，是故名车。

“阇者，是正解脱，无有老相，是故名阇。

“阇^{重音}者⁷⁷，烦恼繁茂，譬如稠林，是故名阇。

“若者，是智慧义，知真法性，是故名若。

“吒者，于阇浮提示现半身而演说法，譬如半月，是故名吒。

⁷⁶ 大正藏：重音伽者；永乐北藏及龙藏：伽（重音）者

⁷⁷ 大正藏：重音阇者；永乐北藏及龙藏：阇（重音）者

“佗者⁷⁸，法身具足，譬如满月，是故名佗^{土家切}。

“茶者，是愚痴僧，不知常与无常，譬如小儿，是故名茶。

“茶^{重音}者⁷⁹，不知师恩，譬如羝羊，是故名茶。

“拏者⁸⁰，非是圣义，譬如外道，是故名拏。

“多者，如来于彼告诸比丘：‘宜离惊畏，当为汝等说微妙法。’是故名多。

“他者，名愚痴义。众生流转生死，自缠如蚕蛄蜩⁸¹，是故名他。

“陀者，名曰大施，所谓大乘，是故名陀。

“陀^{重音}者⁸²，称赞功德，所谓三宝如须弥山，高峻广大，无有倾倒，是故名陀。

“那者，三宝安住，无有倾动，譬如门阌，是故名那。

“波者，名颠倒义。若言三宝悉皆灭尽，当知是人为自疑惑，是故名波。

“颇者，是世间灾。若言世间灾起之时，三宝亦尽。当知是人愚痴无智，违失圣旨，是故名颇。

⁷⁸ 大正藏：佗（土家反）者；永乐北藏及龙藏：佗者

⁷⁹ 大正藏：重音茶者；永乐北藏及龙藏：茶（重音）者

⁸⁰ 大正藏：拏

⁸¹ 大正藏：自缠如蚕

⁸² 大正藏：重音陀者；永乐北藏及龙藏：陀（重音）者

“婆者，名佛十力，是故名婆。

“重音婆者⁸³，名为重担。堪任荷负无上正法，当知是人是大菩萨，是故名婆。

“摩者，是诸菩萨严峻制度，所谓大乘大般涅槃，是故名摩。

“耶⁸⁴者，是诸菩萨，在在处处，为诸众生说大乘法，是故名耶。

“啰者，能坏贪欲、瞋恚、愚痴，说真实法，是故说啰。

“轻音罗者⁸⁵，名声闻乘动转不住。大乘安固⁸⁶，无有倾动，舍声闻乘，精勤修习无上大乘，是故名罗。

“和者，如来世尊为诸众生雨大法雨，所谓世间呪术经书，是故名和。

“除者，远离三箭，是故名除。

“沙者，名具足义。若能听是《大涅槃经》，则为已得闻持一切大乘经典，是故名沙。

“娑者，为诸众生演说正法，令心欢喜，是故名娑。

“呵者，名心欢喜。‘奇哉！世尊离一切行。

⁸³ 大正藏：重音婆者；永乐北藏及龙藏：婆（重音）者

⁸⁴ 大正藏：邪

⁸⁵ 大正藏：轻罗者；永乐北藏及龙藏：罗（轻音）者

⁸⁶ 大正藏：隐

怪哉！如来入般涅槃。’是故名呵。

“罗者，名曰魔义。无量诸魔不能毁坏如来秘藏，是故名罗^{来家切}。复次，罗者，乃至示现随顺世间有父母妻子，是故名罗。

“鲁、流、卢、楼，如是四字说有四义，谓佛、法、僧及以对法。言对法者，随顺世间，如提婆达示现坏僧，化作种种形貌色像，为制戒故。智者了达，不应于此而生畏怖，是名随顺世间之行。以是故，名鲁、流、卢、楼。

“吸气、舌根、随鼻之声，长短超声，随音解义，皆因舌齿而有差别。如是字义，能令众生，口业清净。众生佛性则不如是假于文字然后清净。何以故？性本净故。虽复处在阴、界、入中，而亦不同阴、界、入也⁸⁷。是故，众生悉应归依。诸菩萨等以佛性故，等视众生无有差别。是故半字于诸经书、记论、文章而为根本。又，半字义皆是烦恼言说之本，故名半字。满字者，乃是一切善法言说之根本也。譬如世间为恶行者名为半人，修善行者名为满人。如是一切经书、记论，皆因半字而为根本。若言如来及正解脱入于半字，是事不然。何以故？离文字故。是故，如来于一

⁸⁷ 大正藏：而不同于阴入界也；永乐北藏及龙藏：而亦不同阴界入也

切法无阂⁸⁸无著，真得解脱。

“何等名为解了字义？有知如来出现于世能灭半字，是故名为解了字义。若有随逐半字义者，是人不知如来之性。

“何等名为无字义耶？亲近修习不善法者，是名无字。又，无字者，虽能亲近修习善法，不知如来常与无常，恒与非恒，及法、僧二宝，律与非律，经与非经，魔说佛说。若有不能如是分别，是名随逐无字义也。我今已说如是随逐无字之义。善男子，是故汝今应离半字，善解满字。”

迦叶菩萨白佛言：“世尊！我等应当善学字数。今我值遇无上之师，已受如来殷勤诲勅。”

佛赞迦叶：“善哉！善哉！乐正法者，应如是学。”

鸟喻品第十四⁸⁹

佛复告迦叶⁹⁰：“善男子，鸟有二种，一名迦邻提，二名鸳鸯，游止共俱，不相舍离。是苦、无常、无我等法，亦复如是，不得相离。”

迦叶菩萨白佛言：“世尊！云何是苦、无常、

⁸⁸ 大正藏：碍

⁸⁹ 大正藏：大般涅槃经鸟喻品第十四

⁹⁰ 大正藏：尔时，佛告迦叶菩萨

无我如彼鸳鸯、迦邻提鸟？”

佛言：“善男子，异法是苦、异法是乐；异法是常、异法无常；异法是我、异法无我。譬如稻米，异于麻麦，麻麦复异豆粟、甘蔗。如是诸种，从其萌芽，乃至华叶，皆是无常；果实成熟，人受用时，乃名为常。何以故？性真实故。”

迦叶白佛言：“世尊！如是等物，若是常者，同如来耶？”

佛言：“善男子，汝今不应作如是说。何以故？若言如来如须弥山，劫坏之时，须弥崩倒，如来尔时，岂同坏耶？善男子，汝今不应受持是义。善男子，一切诸法，唯除涅槃，更无一法而是常者，直以世谛言果实常。”

迦叶菩萨白佛言：“世尊！善哉！善哉！如佛所说。”

佛告迦叶：“如是，如是。善男子，虽修一切契经诸定，乃至未闻大般涅槃，皆言一切悉是无常。闻是经已，虽有烦恼，如无烦恼，即能利益一切人天。何以故？晓了己身有佛性故，是名为常。

“复次，善男子，如菴罗树⁹¹，其华始敷，

⁹¹ 大正藏：譬如菴罗树

名无常相；若成果实，多所利益，乃名为常。如是，善男子，虽修一切契经诸定，未闻如是大涅槃时，咸言一切悉是无常。闻是经已，虽有烦恼，如无烦恼，即能利益一切人天。何以故？晓了己⁹²身有佛性故，是名为常。

“复次，善男子，譬如金矿，消镕⁹³之时，是无常相；镕⁹⁴已成金，多所利益，乃名为常。如是，善男子，虽修一切契经诸定，未闻如是大涅槃时，咸言一切悉是无常。闻是经已，虽有烦恼，如无烦恼，即能利益一切人天。何以故？晓了己⁹⁵身有佛性故，是名为常。

“复次，善男子，譬如胡麻，未被压时，名曰无常；既压成油，多有利益，乃名为常。善男子，虽修一切契经诸定，未闻如是大涅槃时，咸言一切悉是无常。闻是经已，虽有烦恼，如无烦恼，即能利益一切人天。何以故？晓了己身有佛性故，是名为常。

“复次，善男子，譬如众流，皆归于海。一切契经诸定三昧，皆归大乘《大涅槃经》。何以故？究竟善说有佛性故。善男子，是故，我言异

⁹² 大正藏：自

⁹³ 大正藏：融

⁹⁴ 大正藏：融

⁹⁵ 大正藏：自

法是常、异法无常，乃至无我亦复如是。”

迦叶菩萨白佛言：“世尊！如来已离忧悲毒箭。忧悲者⁹⁶，名为天，如来非天。忧悲者，名为人，如来非人。忧悲者，二十五有⁹⁷，如来非二十五有。是故，如来无有忧悲，何故称言如来忧悲？”

“善男子，无想天者，名为无想，若无想者，则无寿命，若无寿命，云何而有阴界诸入？以是义故，无想天寿不可说言有所住处。善男子，譬如树神，依树而住，不得定言依枝、依节、依茎、依叶，虽无定所，不得言无；无想天寿，亦复如是。善男子，佛法亦尔，甚深难解，如来实无忧悲苦恼，而于众生起大慈悲，现有忧悲，视诸众生如罗睺罗。复次，善男子，无想天中所有寿命，唯佛能知，非余所及，乃至非想非非想处亦复如是。

“迦叶，如来之性，清净无染，犹如化身，云何当有忧悲苦恼？若言如来有⁹⁸忧悲者，云何能利一切众生弘广佛法？若言无者，云何而言等视众生如罗睺罗？若不等视如罗睺罗，如是之言

⁹⁶ 大正藏：夫忧悲者；永乐北藏及龙藏：忧悲者

⁹⁷ 大正藏：名二十五有；永乐北藏及龙藏：二十五有

⁹⁸ 大正藏：有；永乐北藏及龙藏：无

则为虚妄。以是义故，善男子，佛不可思议，法不可思议，众生佛性⁹⁹不可思议，无想天寿不可思议。如来有忧及以无忧是佛境界，非诸声闻、缘觉所知。

“善男子，譬如空中，舍宅、微尘不可¹⁰⁰住立，若言舍宅不因空住，无有是处。以是义故，不可说舍住于虚空、不住虚空。凡夫之人，虽复说言舍住虚空，而是虚空实无所住。何以故？性无住故。善男子，心亦如是，不可说言住阴、界、入及以不住。无想天寿，亦复如是；如来忧悲，亦复如是。若无忧悲，云何说言等视众生如罗睺罗？若言有者，复云何言性同虚空？”

“善男子，譬如幻师，虽复化作种种宫殿、杀生长养、系缚放舍，及作金、银、琉璃、宝物、丛林、树木，都无实性。如来亦尔，随顺世间示现忧悲，无有真实。善男子，如来已入大般涅槃，云何当有忧悲苦恼？若谓如来入于涅槃是无常者，当知是人则有忧悲。若谓如来不入涅槃，常住不变，当知是人无有忧悲。如来有忧及以无忧，无能知者。

⁹⁹ 大正藏：众生佛性；永乐北藏及龙藏：众生性

¹⁰⁰ 大正藏：得；永乐北藏及龙藏：可

“复次，善男子，譬如下人，能知下法，不知中上；中者知中，不知于上；上者知上，及知中、下。声闻、缘觉亦复如是，齐知自地。如来不尔，悉知自地及以他地。是故，如来名无阂智。示现幻化，随顺世间，凡夫肉眼谓是真实，而欲尽知如来无阂无上智者，无有是处。有忧无忧，唯佛能知。以是因缘，异法有我，异法无我，是名鸳鸯、迦邻提性¹⁰¹。

“复次，善男子，佛法犹如鸳鸯共行，是迦邻提及鸳鸯鸟，盛夏水长¹⁰²，选择高原安处其子，为长养故，然后随本安隐而游。如来出世，亦复如是，化无量众生¹⁰³令住正法。如彼鸳鸯、迦邻提鸟，选择高原安置其子，如来亦尔，令诸众生所作办已，即便入于大般涅槃。善男子，是名异法是苦、异法是乐，诸行是苦、涅槃是乐，第一微妙，坏诸行故。”

迦叶菩萨白佛言：“世尊！云何众生得涅槃者，名第一乐？”

佛言：“善男子，如我所说：‘诸行和合，名为老死。’

¹⁰¹ 大正藏：性；永乐北藏及龙藏：鸟

¹⁰² 大正藏：涨

¹⁰³ 大正藏：化无量众生；永乐北藏及龙藏：无量众生

谨慎无放逸 是处名甘露
放逸不谨慎 是名为死句
若不放逸者 则得不死处
如其放逸者 常趣于死路

“若放逸者，名有为法，是有为法，为第一苦；不放逸者，则名涅槃，彼涅槃者，名为甘露、第一最乐。若趣诸行，是名死处，受第一苦。若至涅槃，则名不死，受最妙乐。若不放逸，虽习¹⁰⁴诸行，是亦名为常乐、不死、不破坏身。云何放逸？云何不放逸？非圣凡夫，是名放逸常死之法；出世圣人，是不放逸，无有老死。何以故？入于第一常乐涅槃。以是义故，异法是苦，异法是乐；异法是我、异法无我。如人在地，仰观虚空，不见鸟迹。善男子，众生亦尔，无有天眼，在烦恼中，而不自见有如来性。是故我说无我密教。所以者何？无天眼者，不知真我。横计我故，因诸烦恼所造有为，即是无常。是故，我说异法是常、异法无常。

精勤¹⁰⁵勇健者 若处于山顶
平地及旷野 常见诸凡夫

¹⁰⁴ 大正藏：集

¹⁰⁵ 大正藏：进

升大智慧殿 无上微妙台

既自除忧患 亦见众生忧

“如来悉断无量烦恼，住智慧山，见诸众生，常在无量亿烦恼中。”

迦叶菩萨白佛言¹⁰⁶：“世尊！如偈所说，是义不然。何以故？入涅槃者，无忧无喜。云何得升智慧台殿？复当云何住在山顶而见众生？”

佛言：“善男子，智慧殿者，即名涅槃。无忧患者，谓如来也；有忧患者，名凡夫人。以凡夫忧故，如来无忧。须弥山顶者，谓正解脱。勤精进者，譬须弥山无有动转。地谓有为行也，是诸凡夫安住是地，造作诸行。其智慧者，则名正觉，离有常住故名如来。如来怜悯无量众生，常为诸有毒箭所中，是故名为如来有忧。”

迦叶菩萨白佛言¹⁰⁷：“世尊！若使如来有忧悲者，则不得称为等正觉。”

佛告迦叶¹⁰⁸：“皆有因缘，随有众生应受化处，如来于中示现受生，虽现受生而实无生，是故，如来名常住法，如迦邻提、鸳鸯等鸟。”

大般涅槃经卷第八

¹⁰⁶ 大正藏：迦叶菩萨复白佛言

¹⁰⁷ 大正藏：迦叶菩萨复白佛言

¹⁰⁸ 大正藏：佛言：“迦叶

大般涅槃经卷第九

北凉天竺三藏昙无讖译 梵

宋沙门慧严慧观同谢灵运再治

月喻品第十五

佛告迦叶：“譬如有人，见月不现，皆言：‘月没。’而作没想，而此月性实无没也。转现他方，彼处众生复谓：‘月出。’而此月性实无出也。何以故？以须弥山障故不现。其月常生，性无出没。如来、应供、正遍知亦复如是，出现三千大千世界或阎浮提，示有父母，众生皆谓：‘生阎浮提。’或阎浮提示现涅槃，如来之性实无涅槃，而诸众生皆谓：‘如来实般涅槃。’譬如月没。善男子，如来之性实无生灭，为化众生示有生灭。

“善男子，如此满月，余方见半；此方半月，余方见满。阎浮提人，若见月初，皆谓一日，起初月想；见月盛满，谓十五日，生盛满想。而此月性实无亏盈，因须弥山而有增减。善男子，如来亦尔，于阎浮提或现初生，或示¹⁰⁹涅槃。现始生时，犹如初月，一切皆谓童子初生；行于七步，

¹⁰⁹ 大正藏：现

如二日月；或复示现入于书堂，如三日月；示现出家，如八日月；放大智慧微妙光明，能破无量众生魔众，如十五日盛满之月；或复示现三十二相、八十种好以自庄严而现涅槃，譬¹¹⁰如月蚀。如是众生所见不同，或见半月，或见满月，或见月蚀，而此月性实无增减、侵蚀之者，常是满月。如来之身亦复如是，是故名为常住不变。

“复次，善男子，譬如满月，一切悉现，在在处处，城邑、聚落、山泽水中，若井若池，及诸水器，一切皆现。有诸众生，行百由旬、百千由旬，见月常随，凡夫愚人妄生忆想，言：‘我本于城邑屋宅见如是月，今复于此空泽见之，为是本月？为异于本？’各作是念月形大小，或言如鍍口，或言如车轮，或言如四十九由旬。一切皆见月之光明，或见团圆犹如金盘。是月性一，种种众生各见异相。善男子，如来亦尔，出现于世，或有人天而作是念：‘如来今者，在我前住。’复有畜生亦生是念：‘如来今者，在我前住。’或有聋症，亦见如来有聋症相。众生杂类，言音各异，皆谓如来悉同己语，亦各生念：‘在我舍宅，受我供养。’或有众生，见如来身广大无量，或

¹¹⁰ 大正藏：喻

见微小，或有见佛是声闻像，或复有见为缘觉像。有诸外道复各念言：‘如来今者，在我法中出家学道。’或有众生复作是念：‘如来今者，独为我故出现于世。’如来实性，譬如彼月，即是法身，是无生身、方便之身，随顺于世，示现无量本业因缘，在在处处示现有生，犹如彼月。以是义故，如来常住，无有变异。

“复次，善男子，如罗睺罗阿修罗王以手遮月，世间之¹¹¹人咸谓月蚀。阿修罗王实不能蚀，以阿修罗障其明故。是月团圆，无有亏损，但以手障故使不现。若摄手时，世间咸谓月复还生，皆言是月多受苦恼。假使百千阿修罗王，不能恼之。如来亦尔，示有众生于如来所，生粗恶心，出佛身血，起五逆罪至一阐提，为未来世诸众生故，如是示现坏僧断法而作留难。假使无量百千亿¹¹²魔，不能侵出如来身血。所以者何？如来之身，无有血、肉、筋、脉、骨、髓，如来真实，实无恼坏，众生皆谓：‘法僧毁坏，如来灭尽。’而如来性，真实无变，无有破坏，随顺世间如是示现。

¹¹¹ 大正藏：诸

¹¹² 大正藏：诸；永乐北藏及龙藏：亿

“复次，善男子，如二人斗，若以刀杖伤身出血，虽至于死，不起杀想，如是业相，轻而不重。于如来所，本无杀心，虽出身血，是业亦尔，轻而不重。如来如是于未来世，为化众生示现业报。

“复次，善男子，犹如良医，勤教其子医方根本：‘此是根药，此是茎¹¹³药，此是色药，种种相貌，汝当善知。’其子敬奉父之所勅，精勤习学，善解诸药。是医后时，寿尽命终，其子号慕而作是言：‘父本教我，根药如是，茎药如是，华药如是，色相如是。’如来亦尔，为化众生示现制戒：‘应当如是受持，莫犯作五逆罪、诽谤正法及一阐提。’为未来世起是事者，是故示现，欲令比丘，于佛灭后，作如是知：‘此是契经甚深之义，此是戒律轻重之相，此是阿毗昙分别法句。’如彼医子。

“复次，善男子，如人见月，六月一蚀¹¹⁴；而上诸天，须臾之间已见月蚀。何以故？彼天日长，人间短故。善男子，如来亦尔，天人咸谓如来短寿，如彼天人须臾之间频见月蚀。如来又于

¹¹³ 大正藏：茎；永乐北藏及龙藏：味

¹¹⁴ 大正藏：蚀；永乐北藏及龙藏：食

须臾之间，示现百千万亿涅槃，断烦恼魔、阴魔、死魔。是故，百千万亿天魔悉知如来入般涅槃。又复示现无量百千先业因缘，随顺世间种种性故，示现如是无量无边不可思议。是故，如来常住无变。

“复次，善男子，譬如明月，众生乐见，是故称月号为乐见。众生若有贪、恚、愚痴，则不得称为乐见也。如来如是，其性纯善，清净无垢，是最可称为乐见也。乐法众生视之无厌，恶心之人不喜瞻睹。以是义故，故言如来譬如明月。

“复次，善男子，譬如日出有三时异，谓春、夏、冬，冬日则短，春日处中，夏日极长。如来亦尔，于此三千大千世界，为短寿者及诸声闻示现短寿，斯等见已，咸谓如来寿命短促，譬如冬日。为诸菩萨示现中寿，若至一劫若减一劫，譬如春日。唯佛睹佛，其寿无量，譬如夏日。

“善男子，如来所说方等大乘微密之教，示现世间，雨大法雨。于未来世，若有人能护持是典，开示分别利益众生，当知是辈是真菩萨，譬如盛夏，天降甘雨。若有声闻、缘觉之人，闻佛如来微密之教，譬如冬日，多遇冷患。菩萨之人，若闻如是微密教诲，如来常住，性无变易，譬如

春日，萌芽开敷。而如来性实无长短，为世间故，示现如是，即是诸佛，真实法性。

“复次，善男子，譬如众星，昼则不现，而人皆谓昼星灭没，其实不没，所以不现，日光映故。如来亦尔，声闻、缘觉不能得见，犹如世人，不见昼星。

“复次，善男子，譬如阴闇，日月不现，愚人谓言：‘日月失没。’而是日月，实无失没。如来正法灭尽之时，三宝现没亦复如是，非为永灭。是故，当知如来常住，无有变易。何以故？三宝真性不为诸垢之所染故。

“复次，善男子，譬如黑月，彗星夜现，其明炎炽，暂出还没，众生见已，生不祥想。诸辟支佛亦复如是，出无佛世，众生见已，皆谓如来真实灭度，生忧悲想。而如来身，实不灭没¹¹⁵，如彼日月，无有灭没。

“复次，善男子，譬如日出，众雾悉除。此大涅槃微妙经典亦复如是，出兴于世，若有众生一经耳者，悉能除灭¹¹⁶一切诸恶、无间罪业。是大涅槃甚深境界不可思议，善说如来微密之性。

¹¹⁵ 大正藏：度

¹¹⁶ 大正藏：悉能灭除

以是义故，诸善男子、善女人等，应于如来生常住心，无有变易，正法不断，僧宝不灭。是故，应当多修方便，勤学是典，是人不久当得阿耨多罗三藐三菩提。是故此经名为无量功德所成，亦名菩提不可穷尽。以不尽故，故得称为大般涅槃；有善光故，犹如夏日；身无边故，名大涅槃。

菩萨品第十六¹¹⁷

“复次，善男子，如日月光，诸明中最，一切诸明所不能及。大涅槃光亦复如是，于诸契经三昧光明最为殊胜，诸经三昧所有光明所不能及。何以故？大涅槃光能入众生诸毛孔故。众生虽无菩提之心，而能为作菩提因缘，是故复名大般涅槃。”

迦叶菩萨白佛言：“世尊！如佛所说‘大涅槃光入于一切众生毛孔，众生虽无菩提之心，而能为作菩提因’者，是义不然。何以故？世尊！犯四重禁、作五逆人及一阐提，光明入身作菩提因者，如是等辈与持净戒、修习诸善有何差别？若无差别，如来何故说四依义？世尊！又如佛言‘若有众生闻大涅槃，一经于耳，则得断除诸烦

¹¹⁷ 大正藏：大般涅槃经菩萨品第十六

恼’者，如来云何先¹¹⁸说：‘有人恒沙佛所发菩提心，闻大涅槃不解其义。’若不解义，云何能断一切烦恼？”

佛言：“善男子，除一阐提，其余众生闻是经已，悉皆能作菩提因缘。法声光明入毛孔者，必定当得阿耨多罗三藐三菩提。何以故？若有人能供养恭敬无量诸佛，方乃得闻《大涅槃经》，薄福之人则不得闻。所以者何？大德之人乃能得闻如是大事，凡夫下劣则不得闻。何等为大事？所谓诸佛甚深秘藏，如来性是。以是义故，名为大事。”

迦叶菩萨白佛言：“世尊！云何未发菩提心者得菩提因？”

佛告迦叶：“若有闻是《大涅槃经》，言‘我不用发菩提心’诽谤正法，是人即于梦中见罗刹像，心中怖惧¹¹⁹。罗刹语言：‘咄，善男子，汝今若不发菩提心，当断汝命。’是人惶怖寤¹²⁰已，即发菩提之心。是人命终，若在三趣及在人天，续复忆念菩提之心，当知是人是大菩萨摩訶萨也。以是义故，是大涅槃威神之力，能令未发菩提心

¹¹⁸ 大正藏：先；永乐北藏及龙藏：上

¹¹⁹ 大正藏：懼

¹²⁰ 大正藏：觉

者作菩提因。善男子，是名菩萨发心因缘，非无因缘。以是义故，大乘妙典真佛所说。

“复次，善男子，如虚空中兴大云雨，注于大地，枯木、石山、高原、堆阜，水所不住，流注下田，陂池悉满，利益无量一切众生。是大涅槃微妙经典亦复如是，雨大法雨，普润众生，唯一阐提发菩提心，无有是处。

“复次，善男子，譬如焦种，虽遇甘雨，百千万劫终不生芽；芽若生者，无有是处。一阐提辈亦复如是，虽闻如是大般涅槃微妙经典，终不能发菩提心芽；若能发者，无有是处。何以故？是人断灭一切善根，如彼焦种，不能复生菩提根芽。

“复次，善男子，譬如明珠置浊水中，以珠威德，水即为清；投之淤泥，不能令清。是大涅槃微妙经典亦复如是，置余众生五无间罪、四重禁法浊水之中，犹可澄清发菩提心；投一阐提淤泥之中，百千万岁，不能令清起菩提心。何以故？是一阐提灭诸善根，非其器故。假使是人百千万岁听受如是《大涅槃经》，终不能发菩提之心。所以者何？无善心故。

“复次，善男子，譬如药树，名曰药王，于

诸药中，最为殊胜，若和乳酪、若蜜、若酥、若水、若浆、若末、若丸，若以涂创¹²¹、熏身、涂目，若见若嗅，能灭众生一切诸病。如是药树不作是念：‘一切众生，若取我根，不应取叶；若取叶者，不应取根；若取身者，不应取皮；若取皮者，不应取身。’是树虽复不生是念，而能除灭一切病苦。善男子，是大涅槃微妙经典亦复如是，能除一切众生恶业、四波罗夷、五无间罪、若内若外所有诸恶，诸有未发菩提心者，因是则得发菩提心。何以故？是妙经典，诸经中王，如彼药树诸药中王。若有修习是大涅槃及不修者，若闻有是经典名字，闻已敬信，所有一切烦恼重病皆悉除灭，唯不能令一阐提辈安住阿耨多罗三藐三菩提。如彼妙药，虽能疗愈种种重病，而不能治必死之人。

“复次，善男子，如人手疮，捉持毒药，毒则随入；若无疮者，毒则不入。一阐提辈亦复如是，无菩提因，如无疮者，毒不得入。所谓疮者，即是无上菩提因缘；毒者，即是第一妙药；全无疮者，谓一阐提。

“复次，善男子，譬如金刚，无能坏者，悉

¹²¹ 大正藏：疮

能破坏一切之物，唯除龟甲及白羊角。是大涅槃微妙经典亦复如是，悉能安止无量众生于菩提道，唯不能令一阐提辈，立菩提因。

“复次，善男子，如马齿草、娑罗翅树、尼迦罗树，虽断枝茎，续生如故。不如多罗，断已不生。是诸众生亦复如是，若得闻是《大涅槃经》，虽犯四禁及五无间，犹故能生菩提因缘。一阐提辈则不如是，虽得听受是妙经典，而不能生菩提道因。

“复次，善男子，如佉陀罗树¹²²、镇头迦树，断已不生。一阐提辈亦复如是，虽得闻是《大涅槃经》，而不能发菩提因缘。

“复次，善男子，譬如大雨，终不住空。是大涅槃微妙经典亦复如是，普雨法雨，于一阐提则不能住。是一阐提，周体密致，犹如金刚，不容外物。”

迦叶菩萨白佛言：“世尊！如佛说偈：

不见善不作 唯见恶可作
是处可怖畏 犹如险恶道

“世尊！如是所说有何等义？”

佛言：“善男子，不见者，谓不见佛性；善

¹²² 大正藏：如佉陀罗

者，即是阿耨多罗三藐三菩提；不作者，所谓不能亲近善友；唯见者，见无因果；恶者，谓谤方等大乘经典；可作者，谓一阐提说无方等。以是义故，一阐提辈无心趣向清净善法。何等善法？谓涅槃也。趣涅槃者，谓能修习贤善之行。而一阐提无贤善行，是故不能趣向涅槃。是处可畏者，谓谤正法。谁应怖畏？所谓智者。何以故？以谤法者无有善心及方便故。险恶道者，谓诸行也。”

迦叶复言：“如佛所说：

云何见所作 云何得善法

何处不怖畏 如王夷坦道

“是义何谓？”

佛言：“善男子，见所作者，发露诸恶，从生死际所作诸恶悉皆发露，至无至处。以是义故，是处无畏。譬如人王，所游正路，其中盗贼，悉皆逃走。如是发露，一切诸恶悉灭无余。复次，不见所作者，谓一阐提所作众恶而不自见。是一阐提，憍慢心故，虽多作恶，于是事中，初无怖畏，以是义故，不得涅槃，譬如猕猴，捉水中月。善男子，假使一切无量众生一时成就阿耨多罗三藐三菩提已，此诸如来亦复不见彼一阐提得成菩提，以是义故，名不见所作。又复，不见谁之所

作？所谓不见如来所作。佛为众生说有佛性，一阐提辈流转生死不能知见，以是义故，名为不见如来所作。又，一阐提见于如来毕竟涅槃谓真无常，犹如灯灭，膏油俱尽。何以故？是人恶业不损灭¹²³故。若有菩萨所作善业回向阿耨多罗三藐三菩提时，一阐提辈虽复毁些、破坏、不信，然诸菩萨犹故施与，欲共成就无上之道。何以故？诸佛法尔。

作恶不即受 如乳即成酪
犹灰覆火上 愚者轻蹈之

“一阐提者，名为无目，是故不见阿罗汉道。如阿罗汉不行生死险恶之道。以无目故，诽谤方等，不欲修习如阿罗汉勤修慈心。一阐提辈不修方等，亦复如是。若人说言：‘我今不信声闻经典，信受大乘，读诵解说，是故我今即是菩萨。一切众生悉有佛性，以佛性故，众生身中即有十力、三十二相、八十种好。我之所说不异佛说。汝今与我俱破无量诸恶烦恼，如破水瓶，以破结故，即能得见阿耨多罗三藐三菩提。’是人虽作如是演说，心实不信有如来性¹²⁴，为利养故，随

¹²³ 大正藏：减；永乐北藏及龙藏：灭

¹²⁴ 大正藏：其心实不信有佛性；永乐北藏及龙藏：心实不信有如来性

文而说。如是说者，名为恶人。如是恶人，不速受果，如乳成酪。譬如王使，善能谈论，巧于方便，奉命他国，宁丧身命，终不匿王所说言教。智者亦尔，于凡夫中不惜身命，要必宣说大乘方等如来秘藏，一切众生皆有佛性。

“善男子，有一阐提作罗汉像，住于空处诽谤方等大乘经典。诸凡夫人见已，皆谓：‘真阿罗汉！是大菩萨摩訶萨！’是一阐提恶比丘辈，住阿兰若处，坏阿兰若法，见他得利，心生嫉妬，作如是言：‘所有方等大乘经典，悉是天魔波旬所说。’亦说：‘如来是无常法。’毁灭正法，破坏众僧。复作是言：‘波旬所说，非善顺说。’作是宣说邪恶之法，是人作恶不即受报，如乳成酪，灰覆火上，愚轻蹈之，如是人者，谓一阐提。是故当知大乘方等微妙经典必定清净，如摩尼珠投之浊水，水即为清，大乘经典亦复如是。

“复次，善男子，譬如莲华，为日所照，无不开敷。一切众生亦复如是，若得见闻大涅槃日，未发心者，皆悉发心，为菩提因。是故，我说大涅槃光所入毛孔必为妙因。彼一阐提，虽有佛性，而为无量罪垢所缠，不能得出，如蚕处茧。以是业缘，不能得生菩提妙因，流转生死，无有穷已。

“复次，善男子，如优钵罗华、钵头摩华、拘物头华、芬陀利华，生淤泥中而不为彼淤泥所污。若有众生，修大涅槃微妙经典亦复如是，虽有烦恼，终不为彼烦恼所污。何以故？以知如来性、相、力故。

“善男子，譬如有国，多清凉风，若触众生身诸毛孔，能除一切郁蒸之恼。此大乘典《大涅槃经》亦复如是，遍入一切众生毛孔，为作菩提微妙因缘，除一阐提。何以故？非法器故。

“复次，善男子，譬如良医，解八种药，灭一切疾¹²⁵，唯不能除阿萨阇病。一切契经、禅定、三昧亦复如是，能治一切贪、恚、愚痴诸烦恼病，能拔烦恼毒刺等箭，而不能治犯四重禁、五无间罪。善男子，复有良医过八种术，能除众生所有疾¹²⁶苦，唯不能治必死之病。是大涅槃大乘经典亦复如是，能除众生一切烦恼，安住如来清净妙因，未发心者令得发心，唯除必死一阐提辈。

“复次，善男子，譬如良医，能以妙药治诸盲人，令见日月星宿诸明、一切色像，唯不能治生盲之人。是大乘典《大涅槃经》亦复如是，能

¹²⁵ 大正藏：病

¹²⁶ 大正藏：病

为声闻、缘觉之人开发慧眼，令其安住无量无边大乘经典。未发心者，谓犯四禁、五无间罪，悉能令发菩提之心，唯除生盲一阐提辈。

“复次，善男子，譬如良医，善解八术，为治众生一切病苦，种种方药随病与之，所谓吐下、涂身、灌鼻，若熏、若洗、若丸、若散，一切诸药，而贫愚人不欲服之。良医悯念，即将是人还其舍宅，强与令服。以药力故，所患得除。女人产者¹²⁷，阁楼¹²⁸不出，若服此药，阁楼¹²⁹即出，亦令婴儿安乐无患。是大乘典《大涅槃经》亦复如是，所至之处若至舍宅，能除众生无量烦恼，犯四重禁、五无间罪未发心者，悉令发心，除一阐提。”

迦叶菩萨白佛言：“世尊！犯四重禁及五无间名极重恶，譬如断截多罗树头，更不复生。是等未发菩提之心，云何能与作菩提因？”

佛言：“善男子，是诸众生，若于梦中梦堕地狱、受诸苦恼，即生悔心：‘哀哉！我等自招此罪，若我今得脱是罪者，必定当发菩提之心。我今所见最是极恶。’从是寤¹³⁰已，即知正法有

¹²⁷ 大正藏：难；永乐北藏及龙藏：者

¹²⁸ 大正藏：儿衣；永乐北藏及龙藏：阁楼

¹²⁹ 大正藏：儿衣；永乐北藏及龙藏：阁楼

¹³⁰ 大正藏：觉

大果报。如彼婴儿渐渐长大，常作是念：‘是医最良，善解方药，我本处胎，与我母药，母以药故，身得安隐，以是因缘，我命得全。奇哉！我母受大苦恼，满足十月，怀抱我身，既生之后，推干去湿，除去不净大小便利，乳哺长养，将护我身。以是义故，我当报恩¹³¹，色养侍卫，随顺供养。’犯四重禁及无间罪，临命终时，念是大乘《大涅槃经》，虽堕地狱、畜生、饿鬼、天上、人中，如是经典亦为是人作菩提因，除一阐提。

“复次，善男子，譬如良医及良医子，所知深奥，出过诸医，善知除毒无上呪术。若恶毒蛇、若龙、若蝮，以诸呪术呪药使¹³²良。以此良药用涂革屣，以此革屣触诸毒虫，毒为之消，唯除一毒，名曰大龙。是大乘典《大涅槃经》亦复如是，若有众生犯四重禁、五无间罪，悉能消灭，令住菩提，如药革屣能消众毒，未发心者能令发心，安住无上菩提之道。是彼大乘《大涅槃经》威神药故，令诸众生生于安乐，唯除大龙一阐提辈。

“复次，善男子，譬如有人，以新¹³³毒药用涂大鼓，于众人中，击令发声，虽无心欲闻，闻

¹³¹ 大正藏：当报母恩

¹³² 大正藏：令

¹³³ 大正藏：杂；永乐北藏及龙藏：新

之皆死，唯除一人不横死者。是大乘典《大涅槃经》亦复如是，在在处处诸行众生¹³⁴有闻声者，所有贪欲、瞋恚、愚痴悉皆灭尽。其中虽有无心思念，是大涅槃因缘力故，能灭烦恼而结自灭。犯四重禁及五无间，闻是经已，亦作无上菩提因缘，渐断烦恼，除不横死一阐提辈。

“复次，善男子，譬如闇夜，诸所营作一切皆息，若未讫者，要待日明。学大乘者，虽修契经、一切诸定，要待大乘大涅槃日，闻是如来微密之教，然后乃当造菩提业，安住正法。犹如天雨，润益增长一切诸种，成就果实，悉除饥馑，多受丰乐。如来秘藏无量法雨亦复如是，悉能除灭八种热病。是经出世，如彼果实，多所利益安乐一切，能令众生见如来性。如《法华》中八千声闻得受记莳，成大果实，如秋收冬藏，更无所作。一阐提辈亦复如是，于诸善法无所营作。

“复次，善男子，譬如良医，闻他人子非人所持，寻以妙药，并遣一使，勅语使言：‘卿持此药，速与彼人，彼人若遇诸恶鬼神，以药力故，悉当远去。卿若迟晚，吾当自往，终不令彼枉横

¹³⁴ 大正藏：中；永乐北藏及龙藏：生

¹³⁵死也。若彼病人，得见使者及吾威德，众¹³⁶苦当除，得安隐乐。’是大乘典《大涅槃经》亦复如是，若比丘、比丘尼、优婆塞、优婆夷及诸外道，有能受持如是经典，读诵通利，复为他人分别广说，若自书写，令他书写，斯等皆为菩提因缘。若犯四禁及五逆罪，若为邪鬼毒恶所持，闻是经典，所有诸恶，悉皆消灭，如见良医，恶鬼远去。当知是人是真菩萨摩訶萨也。何以故？暂得闻是大涅槃故，亦以生念如来常故。暂得闻者，尚得如是，何况书写、受持、读诵？除一阐提，其余皆是菩萨摩訶萨。

“复次，善男子，譬如聋人，不闻音声。一阐提辈亦复如是，虽复欲听是妙经典而不得闻。所以者何？无因缘故。

“复次，善男子，譬如良医，一切医方无不通达，兼复广知无量呪术。是医见王，作如是言：‘大王今者必有死病¹³⁷。’其王答言：‘卿不见我腹内之事，云何而言有必死病？’医复白言¹³⁸：‘若不见信，应服下药，既下之后，王自验之。’王不肯服。尔时，良医以呪术力令王隐处遍生疮

¹³⁵ 大正藏：枉横

¹³⁶ 大正藏：诸；永乐北藏及龙藏：众

¹³⁷ 大正藏：有必死病；永乐北藏及龙藏：必有死病

¹³⁸ 大正藏：医即答言；永乐北藏及龙藏：医复白言

疮，兼复瘳下，虫血杂出。王见是已，生大怖惧，赞彼良医：‘善哉！善哉！汝¹³⁹先所白，吾不用之，今乃知汝¹⁴⁰于吾此身作大利益。’恭敬是医犹如父母。是大乘典《大涅槃经》亦复如是，于诸众生，有欲无欲，悉能令彼烦恼崩落。是诸众生乃至梦中梦见是经，恭敬供养，譬如大王，恭敬良医。是大良医知必死者，终不治之。是大乘典《大涅槃经》亦复如是，终不能治一阐提辈。

“复次，善男子，譬如良医，善知八种悉能疗治一切诸病，唯不能治必死之人。诸佛菩萨亦复如是，悉能救疗一切有罪，唯不能治必死之人一阐提辈。

“复次，善男子，譬如良医，善知八种微妙经术，复能博达过于八种，以己所知先教其子，若水、若陆、山谷药草，悉令识知。如是渐渐教八事已，次复教余最上妙术。如来、应供、正遍知亦复如是，先教其子诸比丘等，方便除灭一切烦恼，修学净身不坚固想，谓水、陆、山谷。水者，譬身受苦，如水上泡；陆者，譬身不坚，如芭蕉树；山谷者¹⁴¹，譬烦恼中修无我想。以是义

¹³⁹ 大正藏：卿；永乐北藏及龙藏：汝

¹⁴⁰ 大正藏：卿；永乐北藏及龙藏：汝

¹⁴¹ 大正藏：其山谷者

故，身名无我。如来如是于诸弟子渐渐教学九部经法，令善通利，然后教学如来秘藏，为其子故，说如来常。如来如是说大乘典《大涅槃经》，为诸众生已发心者及未发心作菩提因，除一阐提。如是，善男子，是大乘典《大涅槃经》无量无边¹⁴²，不可思议，未曾有也。当知即是无上良医，最尊最胜，众经中王。

“复次，善男子，譬如大船，从海此岸至于彼岸，复从彼岸还至此岸。如来¹⁴³正觉亦复如是，乘大涅槃大乘宝船，周旋往反¹⁴⁴，济度¹⁴⁵众生，在在处处，有应度者，悉令得见如来之身。以是义故，如来名曰无上船师。譬如有船，则有船师；有船师¹⁴⁶，则有众生度¹⁴⁷于大海。如来常住化度众生，亦复如是。

“复次，善男子，譬如有人，在大海中，乘船欲渡，若得顺风，须臾之间，则能得过无量由旬；若不得者，虽复久住，经无量岁不离本处，有时船坏，没水而死。众生如是，在彼愚痴生死

¹⁴² 大正藏：数

¹⁴³ 大正藏：来；永乐北藏及龙藏：是

¹⁴⁴ 大正藏：返

¹⁴⁵ 大正藏：渡

¹⁴⁶ 大正藏：以有船师

¹⁴⁷ 大正藏：渡

大海，若¹⁴⁸诸行船，若得值遇大般涅槃猛利之风，则能疾至¹⁴⁹无上道岸；若不值遇，当久流转无量生死，或时破坏，堕于地狱、畜生、饿鬼。

“复次，善男子，譬如有人，不遇风王，久住大海，作是思惟：‘我等今者，必在此死。’如是念时，忽遇利风，随顺渡海。复作是言：‘快哉！是风未曾有也，令我等辈，安隐得过大海之难。’众生如是，久处愚痴生死大海，困苦穷悴，未遇如是大涅槃风，则应生念：‘我等必定堕于地狱、畜生、饿鬼。’是诸众生思惟是时，忽遇大乘大涅槃风，随顺吹向入于阿耨多罗三藐三菩提，方知真实，生奇特想。叹言：‘快哉！我从昔来，未曾见闻如是如来微密之藏。’尔乃于是《大涅槃经》生清净信。

“复次，善男子，如蛇脱皮，为死灭不？”

“不也。世尊！”

“善男子，如来亦尔，方便示现弃舍毒身，可言如来无常灭耶？”

“不也。世尊！”

“如来于此阎浮提中，方便舍身，如彼毒蛇

¹⁴⁸ 大正藏：乘

¹⁴⁹ 大正藏：到

舍于故皮。是故，如来名为常住。

“复次，善男子，譬如金师，得好真金，随意造作种种诸器。如来亦尔，于二十五有悉能示现种种色身，为化众生拔生死故。是故，如来名无边身，虽复示现种种诸身，亦名常住，无有变易。

“复次，善男子，如庵罗树及阎浮树，一年三变，有时生华，光色敷荣；有时生叶，滋茂蓊郁；有时凋¹⁵⁰落，状似枯死。善男子，于意云何？是树实为枯死不耶？”

“不也。世尊！”

“善男子，如来亦尔，于三界中示三种身，有时初生，有时长大，有时涅槃，而如来身实非无常。”

迦叶菩萨赞言：“善哉！诚如圣言¹⁵¹：如来常住，无有变易。”

“善男子，如来密语甚深难解。譬如大王告诸群臣：‘先陀婆来。’先陀婆者，一名四实：一者，盐；二者，器；三者，水；四者，马。如是四物共同一名，有智之臣善知此名，若王洗时，

¹⁵⁰ 大正藏：雕

¹⁵¹ 大正藏：教

索先陀婆，即便奉水；若王食时，索先陀婆，即便奉盐；若王食已，欲饮浆时，索先陀婆，即便奉器；若王欲游¹⁵²，索先陀婆，即便奉马。如是智臣，善解大王四种密语。是大乘经亦复如是，有四无常，大乘智臣应当善知：若佛出世，为众生说如来涅槃。智臣当知，此是如来为计常者说无常相，欲令比丘修无常想。或复说言正法当灭。智臣应知，此是如来为计乐者说于苦相，欲令比丘多修苦想。或复说言，我今病苦，众僧破坏。智臣当知，此是如来为计我者说无我相，欲令比丘修无我想。或复说言，所谓空者，是正解脱。智臣当知，此是如来说正解脱无二十五有，欲令比丘修学空想。以是义故，是正解脱则名为空，亦名不动。谓不动者，是解脱中无有苦故，是故不动。是正解脱为无有相，谓无相者，无有色、声、香、味、触等，故名无相。是正解脱常、不变易，是解脱中无有无常、热恼、变易。是故，解脱名曰常住、不变、清凉。或复说言，一切众生有如来性。智臣当知，此是如来说于常法，欲令比丘修正常法。是诸比丘若能如是随修¹⁵³学者，

¹⁵² 大正藏：若王游时

¹⁵³ 大正藏：顺

当知是人真我弟子，善知如来微密之藏，如彼大王智慧之臣，善知王意。善男子，如是大王亦有如是密语之法，何况如来而当无耶？善男子，是故，如来微密之教难可得知，唯有智者乃能解我甚深佛法，非是世间凡夫品类所能信也。

“复次，善男子，如波罗奢树、迦尼迦树、阿叔迦树，值天亢旱，不生华实，及余水陆所生之物，皆悉枯悴，无有润泽，不能增长，一切诸药，无复势力。善男子，是大乘典《大涅槃经》亦复如是，于我灭后，有诸众生，不能恭敬，无有威德。何以故？是诸众生，不知如来微密藏故。所以者何？以是众生薄福德故。

“复次，善男子，如来正法将欲灭尽，尔时，多有行恶比丘，不知如来微密之藏，懒堕¹⁵⁴懈怠，不能读诵宣扬、分别如来正法。譬如痴贼，弃舍真宝，担负草木，不解如来微密藏故，于是经中懈怠不勤。哀哉！大险！当来之世甚可怖畏。苦哉！众生不勤听受是大乘典《大涅槃经》！唯诸菩萨摩訶萨¹⁵⁵，能于是经，取真实义，不著文字，随顺不逆，为众生说。

¹⁵⁴ 大正藏：懒隋

¹⁵⁵ 大正藏：唯诸菩萨摩訶萨等

“复次，善男子，如牧牛女，为欲卖乳，贪多利故，加二分水转卖与余牧牛女人；彼女得已，复加二分转复卖与近城女人；彼女得已，复加二分转复卖与城中女人；彼女得已，复加二分诣市卖之。时有一人，为子纳妇，急须好乳，以供宾客，至市欲买。是卖乳者，多索价直，是人语言：‘此乳多水，实不直是。值我今日瞻待¹⁵⁶宾客，是故当取。’取已还家，用煮作糜¹⁵⁷，无复乳味。虽无乳味，于苦味中犹胜千倍。何以故？乳之为味，诸味中最。善男子，我涅槃后，正法未灭余八十年，尔时，是经于阎浮提当广流布。是时，当有诸恶比丘抄略是经，分作多分，能灭正法色、香、美味。是诸恶人，虽复诵读如是经典，灭除如来深密要义，安置世间庄严文饰无义之语，抄前著后，抄后著前，前后著中，中著前后。当知如是诸恶比丘，是魔伴侣，受畜一切不净之物，而言如来悉听我畜。如牧牛女多加水乳，诸恶比丘亦复如是，杂以世语，错定是经，令多众生不得正说、正写、正取、尊重赞叹、供养恭敬。是恶比丘为利养故，不能广宣流布是经，所可分流

¹⁵⁶ 大正藏：侍

¹⁵⁷ 大正藏：煮用作糜

少不足言，如彼牧牛贫穷女人展转卖乳，乃至作糜而无乳味。是大乘典《大涅槃经》亦复如是，展转薄淡，无有气味。虽无气味，犹胜余经超逾千倍¹⁵⁸，如彼乳味于诸苦味其胜千倍。何以故？是大乘典《大涅槃经》，于声闻经最为上首，譬如牛乳，味中最胜。以是义故，名大涅槃。

“复次，善男子，若善男子、善女人等，无有不求男子身者。何以故？一切女人皆是众恶之所住处。复次，善男子，如蚊蚋¹⁵⁹水不能令此大地润洽，其女人者，淫欲难满亦复如是。譬如大地，一切作丸令如芥子，如是等男与一女人共为欲事犹不能足；假使男子数如恒沙，与一女人共为欲事亦复不足。善男子，譬如大海，一切天雨、百川、众流皆悉归注，而彼大海未曾满足。女人之法亦复如是，假使一切悉为男子，与一女人共为欲事而亦不足。复次，善男子，如阿叔迦树、波吒罗树、迦尼迦树，春华开敷，群蜂嘒¹⁶⁰取，色、香、细味不知厌足。女人欲男，亦复如是，不知厌足。善男子，以是义故，诸善男子、善女人等，听是大乘《大涅槃经》，常应呵责女人之

¹⁵⁸ 大正藏：犹胜余经越踰千倍

¹⁵⁹ 大正藏：蚊蚋

¹⁶⁰ 大正藏：嘒

相，求于男子。何以故？是大乘典有丈夫相，所谓佛性。若人不知是佛性者，则无男相。所以者何？不能自知有佛性故。若有不能知佛性者，我说是等名为女人；若能自知有佛性者，我说是人为大丈夫；若有女人能知自身定有佛性，当知是等即为男子。善男子，是大乘典《大涅槃经》无量无边不可思议功德之聚。何以故？以说如来秘密藏故。是故，善男子、善女人，若欲速知如来秘密藏，应当方便勤修此经。”

迦叶白佛言¹⁶¹：“世尊！如是，如是。如佛所说，我今已有丈夫之相，得入如来微密藏故。如来今日始觉悟我，因是即得决定通达。”

佛言：“善哉！善哉！善男子，汝今随顺世间之法而作是说。”

迦叶复言：“我不随顺世间法也。”

佛赞迦叶：“善哉！善哉！汝今所知无上法味，甚深难知而能得知。如蜂采¹⁶²味，汝亦如是。复次，善男子，如蚊子泽不能令此大地沾¹⁶³洽，当来之世，是经流布亦复如是，如彼蚊泽。正法欲灭，是经先当没于此地，当知即是正法衰相。

¹⁶¹ 大正藏：迦叶菩萨白佛言

¹⁶² 大正藏：采

¹⁶³ 大正藏：沾

“复次，善男子，譬如过夏，初月名秋，秋雨连霖¹⁶⁴。此大乘典《大涅槃经》亦复如是，为彼南方诸菩萨故，当广流布，降霖¹⁶⁵法雨，弥满其处。正法欲灭，当至鬬宾，具足无缺潜没地中。或有信者，或不信者，如是大乘方等经典甘露法味悉没于地。是经没已，一切诸余大乘经典皆悉灭没。若得是经具足无缺，人中象王诸菩萨等，当知如来无上正法将灭不久。”

尔时，文殊师利白佛言：“世尊！今此纯陀犹有疑心，惟愿如来重为分别，令得除断。”

佛言：“善男子，云何疑心？汝当说之，当为除断。”

文殊师利言：“纯陀心疑如来常住，以得知见佛性力故。若见佛性而为常者，本未见时，应是无常；若本无常，后亦应尔。何以故？如世间物本无今有，已有还无，如是等物，悉是无常。以是义故，诸佛、菩萨、声闻、缘觉无有差别。”

尔时，世尊即说偈言：

本有今无 本无今有
三世有法 无有是处

¹⁶⁴ 大正藏：注

¹⁶⁵ 大正藏：注

“善男子，以是义故，诸佛、菩萨、声闻、缘觉亦有差别，亦无差别。”

文殊师利赞言：“善哉！诚如圣言¹⁶⁶。我今始解诸佛、菩萨、声闻、缘觉亦有差别，亦无差别。”

迦叶菩萨白佛言：“世尊！如佛所说：‘诸佛、菩萨、声闻、缘觉，性无差别。’惟愿如来分别广说，利益安乐一切众生。”

佛言：“善男子，谛听谛听，当为汝说。善男子，譬如长者，多畜乳牛，有种种色，常令一人守护将养。是人有时，为祠祀故，尽穀¹⁶⁷诸牛著一器中，见诸牛乳同一白色，寻便惊怪：‘牛色各异，其乳云何皆同一色？’是人思惟：‘知¹⁶⁸此一切皆是众生业报因缘，令乳色一。’善男子，声闻、缘觉、菩萨亦尔，同一佛性，犹如彼乳。所以者何？同尽漏故。而诸众生言佛、菩萨、声闻、缘觉而有差别，有诸声闻、凡夫之人，疑于三乘云何无别？是诸众生久后自解，一切三乘同一佛性，犹如彼人解悟乳相由业因缘。”

“复次，善男子，譬如金矿，陶¹⁶⁹炼滓秽，

¹⁶⁶ 大正藏：教

¹⁶⁷ 大正藏：构

¹⁶⁸ 大正藏：如

¹⁶⁹ 大正藏：淘

然后消融，成金之后，价直无量。善男子，声闻、缘觉、菩萨亦尔，皆得成就同一佛性。何以故？除烦恼故，如彼金矿除诸滓秽。以是义故，一切众生同一佛性，无有差别。以其先闻如来密藏，后成佛时，自然得知，如彼长者知乳一相。何以故？以断无量亿烦恼故。”

迦叶菩萨白佛言：“世尊！若一切众生有佛性者，佛与众生有何差别？如是说者，多有过咎。若诸众生皆有佛性，何因缘故，舍利弗等以小涅槃而般涅槃？缘觉之人于中涅槃而般涅槃？菩萨之人于大涅槃而般涅槃？如是等人若同佛性，何故不同如来涅槃而般涅槃？”

“善男子，诸佛世尊所得涅槃，非诸声闻、缘觉所得。以是义故，大般涅槃名为善有。世若无佛，非无二乘得二涅槃。”

迦叶复言：“是义云何？”

佛言：“无量无边阿僧祇劫，乃有一佛出现于世，开示三乘。善男子，如汝所言菩萨、二乘无差别者，我先于此如来密藏《大涅槃》中已¹⁷⁰说其义：诸阿罗汉无有善有。何以故？诸阿罗汉悉当得是大涅槃故。以是义故，大般涅槃有毕竟

¹⁷⁰ 大正藏：已；永乐北藏及龙藏：以

乐。是故，名为大般涅槃。”

迦叶言：“如佛说者，我今始知差别之义、无差别义。何以故？一切菩萨、声闻、缘觉未来之世，皆当归于大般涅槃，譬如众流归于大海。是故，声闻、缘觉之人悉名为常，非是无常。以是义故，亦有差别，亦无差别。”

迦叶言：“云何性差别？”

佛言：“善男子，声闻如乳，缘觉如酪，菩萨之人如生熟酥，诸佛世尊犹如醍醐。以是义故，大涅槃中说四种性而有差别。”

迦叶复言：“一切众生性相云何？”

佛言：“善男子，如牛新生，乳血未别，凡夫之性杂诸烦恼，亦复如是。”

迦叶复言：“拘尸那城有旃陀罗，名曰欢喜，佛记是人，由一发心，当于此界千佛数中，速成无上正真之道。以何等故，如来不记尊者舍利弗、目犍¹⁷¹连等速成佛道？”

佛言：“善男子，或有声闻、缘觉、菩萨作誓愿言：‘我当久久护持正法，然后乃成无上佛道。’以发速愿，故与速记。

“复次，善男子，譬如商人，有无价宝诣市

¹⁷¹ 大正藏：犍

卖之，愚人见已，不识轻笑。宝主唱言：‘我此宝珠，价直无数。’闻已复笑，各各相谓：‘此非真宝，是玻璃珠。’善男子，声闻、缘觉亦复如是，若闻速记，则便懈怠，轻笑薄贱，如彼愚人，不识真宝。于未来世，有诸比丘，不能精勤修习善法，贫穷、困苦、饥饿所逼，因是出家长养其身，心志轻躁，邪命谄曲。若闻如来授诸声闻速疾记者，便当大笑、轻慢、毁訾¹⁷²。当知是等即是破戒，自言已得过人之法。以是义故，随发速愿故与速记，护正法者为授远记。”

迦叶菩萨复白佛言：“世尊！菩萨¹⁷³云何当得不坏眷属？”

佛告迦叶：“若诸菩萨勤加精进欲护正法，以是因缘，所得眷属不可沮坏。”

迦叶菩萨复白佛言：“世尊！何因缘故，众生得此唇口干焦？”

佛告迦叶：“若有不识三宝常存，以是因缘，唇口干焦。如人口爽，不知甜、苦、辛、醋、鹹、淡六味差别。一切众生，愚痴无智，不识三宝是长存法，是故名为唇口干焦。”

¹⁷² 大正藏：訾

¹⁷³ 大正藏：菩萨摩訶萨

“复次，善男子，若有众生，不知如来是常住者，当知是人，则为生盲。若知如来是常住者，如是之人，虽有肉眼，我说是等名为天眼。复次，善男子，若有能知如来是常，当知是人，久已修习如是经典，我说是等亦名天眼。虽有天眼，而不能知如来是常，我说斯等名为肉眼。是人乃至不识自身手、足、支节，亦复不能令他识知，以是义故，名为肉眼。

“复次，善男子，如来常为一切众生而作父母。所以者何？一切众生种种形类，二足、四足、多足、无足，佛以一音而为说法，彼彼异类各各得解，悉皆叹言：‘如来今日为我说法。’以是义故，名为父母。

“复次，善男子，如人生子，始十六月，虽复语言，未可解了。而彼父母欲教其语，先同其音，渐渐教之，是父母语可不正耶？”

“不也。世尊！”

“善男子，诸佛如来亦复如是，随诸众生种种音声而为说法，为令安住佛正法故，随所应见而为示现种种形像，如来如是同彼语言，可不正耶？”

“不也。世尊！何以故？如来所说如师子吼，

随顺世间种种音声，而为众生叹¹⁷⁴说妙法。”

大般涅槃经卷第九

¹⁷⁴ 大正藏：劝

● 结诵仪

补阙真言

(三遍)

南無喝啰怛那. 哆罗夜耶. 佉啰佉啰. 俱住俱住. 摩啰摩啰. 虎啰. 吽. 贺贺. 苏怛拿. 吽. 泼抹拿. 娑婆诃.

南無佛 南無法 南無僧 (合掌三称)

南無一切如来、应、正等觉 (合掌三称)

南無本师释迦牟尼佛 (合掌三称)

南無大般涅槃经 (合掌三称)

发愿文

(一遍)

志心忏悔。我(某甲)与一切众生，从无始来，迷失真心，流转生死，六根罪障，无量无边，圆妙佛乘，无以开解，一切所愿，不得现前。我今读诵大般涅槃经，以此善根，发露黑恶，过、现、

未来三业所造无边重罪，皆得消灭，身心清净，惑障蠲除，福智庄严，净因增长，自他行愿速得圆成。愿诸如来常在说法，所有功德起随喜心，回向菩提，证常乐果。命终之日，正念现前，面见弥陀及诸圣众，一刹那顷，生莲华中。普愿众生，俱成佛道。

回向偈

(一遍)

诵经功德殊胜行 无边胜福皆回向
普愿沉溺诸有情 速往无量光佛刹
十方三世一切佛 一切菩萨摩訶萨
摩訶般若波罗蜜

回向偈

(一遍)

愿以此功德 庄严佛净土
上报四重恩 下济三途苦
若有见闻者 悉发菩提心
尽此一报身 同生极乐国

三皈依

(一遍)

自皈依佛，当愿众生，体解大道，发无上心。
自皈依法，当愿众生，深入经藏，智慧如海。自
皈依僧，当愿众生，统理大众，一切无碍，和南
圣众。



此咒置经书中可灭误跨之罪

南无护法韦驮尊天菩萨

